

牧
庵
集
附錄
四



集 詩 牧

牧 詩 集

牧庵集卷十七

神道碑

潁州萬戶邸公神道碑

公邸姓。保定行唐人。諱澤。字潤之。曾祖亨。祖義生。考府君諱琮。金符總押真定大名河間西京保定洛磁濱七州之兵。成睢州以卒。公年十一。世將是軍。七年。去城毫鹿邑。避河流。齧移戍潁州。城久荒棄。薊荆以芟。墮塹樓堞。官舍民廬。皆所經始。宋勅將夏貴夜悉銳東南壁。公將射士當之。大呼疾戰。矢下雨注。又虞士氣久用將奪。戒司更促其漏。丙夜伐五鼓。敵以爲旦。出奇騎擊。不利。客也。騰藉崩潰。積骸如京。創此大治。始不輕犯。戊是十四年。世祖卽位。如故事。盡收臣下先朝制書符節。故公金符亦入之。官明年。制賜還之。至元入覲。賜錦衣弓矢鞍勒。用兵襄陽。將是七州兵半以行。太保并國武宣公。時以都元帥鈔鴉山拔平塞砦。功最幕府。賁白金爲兩五十。金衣一。從城長圍襄陽六年。當十年癸酉。乃下。明年。從太傅巴延公。時以中書右丞相督大軍南伐。至郢。初宋遣殿帥范文虎將兵援襄陽。度不得進。爲城郢備。鎖戰艦江中。列礮于岸。遏我舟師。下令邊舟黃灣。進藤湖入漢。越郢去。從拔新城沙洋下。復師由沙武口入江。從戰青山磯。多所俘馘。鄂隨下行。省論功行賞。賁白銀爲兩三百。明年。留故左丞相阿爾哈雅。時以右丞分省守鄂。大師其東。從右丞分兵下荆南。功進武德將軍。管軍總管。又從攻潭州。流矢貫肘。汰股。裹創復戰。城拔。

進顯武將軍。明年從攻靜江。礮礮傷首。岑岑垂絕。已日乃蘇。旣拔。從省還湖南。其年宋亡。陳宜中挾益衛兩王浮海據閩。爵人號年。規爲興復。倖利之徒。在在起應。而羅飛張虎周隆。尤其梟傑。屠殺長吏。劫民爲兵。動萬爲羣。阻山爲砦。以抗官軍。衡永路絕。公從劉平。生致三渠。褫皮以獻。進懷遠大將軍。萬戶。虎符。俾將其軍監郴州。位總管上。至則平郡賊蕭良弼。劔兵之餘。城中戶纔四百。布檄招徠安集之。內則基屋火餘。外各復產其鄉。期年將倍萬家。孔廟尙茅屋。擢進士左元龍爲校官。佐其工材。俾任興葺。稍如平時。州界韶鄒。遏韶寇不窺宜章。而興寧之民。效惡鄒盜。聞宣慰司將調兵萬人加誅。未啓行。公衡焉。擊金帛。卽說曰。今盜始起。而從徒未繁。官軍遽入。民懼作殺。必出遁逃。無所適歸。勢與盜合。是驅使爲逆也。請歸身任致討。許之。乃歸召父老豪傑。曉曰。吾止官軍。不使得暴吾境。汝佃民有從亂者。不以相坐。聽執送余。自贖得五百人。惟誅首事二十人。餘悉縱還南畝。連三大役。始得占城之師。人以深蹈死地。忿怨無施。所經城市。肆行剽奪。瀕道居民。十室九空。六擾絕種。至郴亦然。公捕得爲暴數十人。械送軍中。詰其部將威令不伸。皆市杖之。其徒一夕潛遁踰境。再以日本之師。責造海艦十五艘。度費楮幣爲貫七十五萬。取材有制。戢吏侵牟。用未能半。事已告集。後以交趾之師。賦餽米千石入桂。公曰。自是入桂。陸行千里。負擔之民。人勝五斗而止。已二千人。爲擔夫負裝糧者。半是行未中道。委負而逃。可前知也。乃集丁之家。謀曰。吾將出家貲。責諸縣。卽桂如數糴之。上不失軍興。而下可紓民力。何如。衆歡呼稱願。他日比貸錢。如子來歸。公悉還其贏。又請罷陶坑銀鑄戶賦酒醋。歲荒發廩而後聞。皆良政也。又遷廬州。蒙古漢軍萬戶。郴民耄倪。

號呼遮留。如去親戚未至。改潁州萬戶。戍無爲軍。至是七路之兵。全集戲下。而軍容益盛。盜起江東。省以公威信著譽。檄公以其軍討之。饒信先譬以禍福。皆不煩兵而從。宣徽怙惡。乃夷萬人于南陵。旌德。涇縣。又鋤萬人于績溪。績溪尤勦勦。壁何秧塘。山周十里。峻二百丈。省臣以六萬衆攻之。數月不能下者。因留戍徽。兼拜都萬戶之一軍。徽民方安之。尋還無爲。省議餘杭勝國故都。非得如公老將一軍。遏而閑之。綏而安之。不可。故移戍杭。以二十八年。其歲辛卯夏六月二十有一日卒。年六十三。平生忠直沈毅。讀書專經左氏春秋。故能謀成而事立。臨財不恡施予。有積則均之昆弟姻戚。其再至潁。故人部曲捐金委帛。致殷家及疾。或在告計日辭祿。後卒十三年。子武德將軍潁州萬戶戍杭元謙。紹介其友劉致持事狀爲書。燧曰。先公之隲。藁藏潁濱。今將舉歸先塋。數宜有碑。不得君銘。恐勳勞不足以信來世。敢泣血請。故銘敍此。嘗聞國初以二萬戶鎮撫中夏。右則劉伯林。軍秦左則納罕。重山。軍燕。顧成則益。太慰忠。武史公天澤。爲真定河間濟南東平大名五路萬戶于中。後強諸侯。頗以力夷惡。相下屬。皆求名將其軍。而千夫之長亦凱得焉。由是萬戶布列天下。其勢雖分。然父死子繼。兄終弟及。相傳虎節。一命三品。世世不絕。則未始變。不若治民治賦之臣者死。子孫以門功官。自下而高。如升階然。所可儕比。則國家責以捍侮四方。勸忠而收其死力者。豈不至且遠哉。觀公造家。譬則爲山。嗣雖總押。其覆簣也。于時是官未必視長千夫。何以言之。從下荆南。勞亦夥矣。授以總管。得以千夫之長同祿。轉而西南。勁敵是膺。堅城是臨。莫不賈勇奮其前。父顧以是身于鹵三軍。入百死而一幸生。遂長萬夫。比德開國大藩諸侯。殆成功九仞者。其爲丈夫。

亦壯烈矣。然非憑夫大帝赫怒。有是南國用武之地。技安施哉。此太史公贊蕭曹輩爲依日月末光。陰符所謂天人合發者也。三夫人元配鄒氏。嚴于持家。前卒二十一年。繼配兩王氏。姊姊也。前卒十年。姊顧爲繼。後卒九年。三男元謙以佳公子。既世虎節。好學而文。雖居平時營柵部署器械車馬。凜如在敵。又識世務。省訟難惑。多資平之。次元泰。元恆。四女適鄒長官子璧。閤令子齡。鄭元帥子端仁。萬戶賈榮祖。三男孫長襟。幼末名。二女孫銘曰。

嗟若邱公。初由羈童。嗣秉父節。雖及鹿邑。凡戌十年。強敵尙逃。城頽而南。地交壤鄰。勦將未嘗。時已能軍。寡謀輕襲。大北其羣。會帝考貢。曰是南紀。于何蕭茅。曠入包圍。乃畀丞相。百萬烝徒。江漢滔滔。鼓枻以浮。分狗坤隅。置公前驅。登陴長沙。桂林入俘。大憚小悖。翦無稽逋。從戰萬里。清楚以吾。歸撫其軀。矢石遺餘。嘗曰。臣子居則有異。移孝爲忠。其道豈二。當在父側。子職焉恭。寸膚之傷。盡心療恫。及身而將。三軍獎率。鼓鼓以前。顛首奚恤。惟公懋功。其賁何如。虎節皇皇。雄長萬夫。上昭祖考。下傳旄檠。子孫其承。世守無止。匪直克忠。孝疇大斯。以語叢後。幾何其慈。宜爾有子。踵武之踐。四十已聞。慎保垂憲。爰發頽匿。歸從先邱。列勳于碑。貽久是謀。

袁公神道碑

袁虞舜裔也。舜生姚墟。居媯汭。子孫以地姚姓。以水媯姓。以有天下之號。則虞姓。及周武封胡公滿于陳。以國陳姓。以陳公諡胡姓。袁則肇于陳大夫轅濤。塗西京。轅固生。猶未省文。至後漢太尉安而下。始爲袁。

矣。其家太原石之臨泉者。不知始何世何人。所可譜。則在金有隱德農畝者。諱亨。生迪。業儒。博極羣書。尚氣節。不食然諾。生企京。有父風。生鐸。丰儀峻修。克世其家學。實生今延安路總管公。諱湘。字潤夫。金之盛國。王公佐持節鎮葭蘆。當吾元勳兵之衝。殫力竭謀。惴不自支。一日。集將佐。使各推辟所知。可與計事者。或言公賢。爲書致之。三往返。始來。用其策以守則完。以戰則捷。衆論多之。聞諸汴京。官以忠顯校尉。遙主延安之延長簿。再以功超武節將軍。令臨泉石與嵐之合河。恃公爲藩援。以安者五年。後王公佐卒。鎮人心離異。不可復一。公曰。吾愛一死哉。死而兵民完。何害。敵以不卽下。蘊怨積憤于我者。爲日已久。吾死而捐兵民以甘其心。吾寧忍哉。遂乘夜載鴟夷濟河。款我大將李罕之營。降解所佩誓曰。所有二子公者。有如此劍。將孥義之。相與飲酒盡歡。以便宜升臨爲州。拔公爲帥。遣將州兵略地鄜延。悉下之。移鎮延安。臨民德之。寧輕去其鄉。不忍去。公多攜家來從。朝廷定賞納土功。授延安路兵馬總管。時旣偃甲。兵民方去危卽安。公敦勸耕稼。裁抑游惰。使各食其力。鄰境聞之。逾河而西。雖有良田美業。不恤願託處深谷者。不可勝計。公符其守令。居借之廬。畊助之牛。儒生之賢而文實聳人瞻聲動人聽者。如侯邱嚴明焦舉華張王明畢美邵瑞張輔之流。欲仕者。則登之幕府。以師羣吏。不者。則升之學宮。以範多士。由是悍俗消革。而禮讓興行矣。會大料民。止籍主戶。漏其僑家浮客者。或咎以何獨損吾戶數。公曰。若欲肥版籍以銜庶耶。一旦賦役下。僑浮生心。必計曰。等賦役也。與避人境而不免。何如歸吾鄉之安焉。客去而主孤。實亡而名存。祇益累也。人服其能圖遠。其後河東山西果徙其民。公謀使者曰。若所以必徙者。豈以代吾賦役而汝無

得哉。吾所籍止主戶。未嘗妄以僑浮爲土著。版冊具在。可稽也。何如勿徙。使各奠其居。卽是民推擇置吏。歲集其賦入。是以吾土育爾民。奚必徙。其以是歸語汝帥。使者亦度民業已安此。雖徙之。且道亡不達。許之而還。尋有詔令民隨在占籍。公猶仁其浮僑。爲輕其調庸。同列舉其能。且位加吾上。多行金帛貴倖。以訟公。徵使就辯。公贊貴幸幣殊涼薄。庭臣以訟者之言方騰。能不以貽免。顧歎重其忠儉。歸益自刻勵。四方行李至者相踵。糜肉不足爲射獵。麋豕以繼。贍勞之須。皆出其家。不足則從富人稱貸。郡民之豪傑謀曰。吾屬依公以生。坐視寡乏。莫之省恤。人曰。我何捐金餉之。亦謝不取。及大封宗室。割所治爲公主湯沐邑。有說公厚斂入謁。可結主知。且無令同列得先之也。公曰。吾豈剝下市寵者耶。不行先朝時。今上以太弟之重。征南詔駐兵六盤山。公見行府。建言始延安之籍民爲兵。皆懸賞募之人。率授銀三十兩。始行及遠戍久役。津餽不如于前。老稚日困于家。則怯者挺身而孤亡。勇者連伍而俱歸。軍吏以法誅之。莫之能止也。非大選閭閻民厚業饒丁者。更代以休其力。盈其氣。則兵帳不完。上然其策。讓鄰道臣之在行府者曰。若曹之來。其所請求。不過官資之崇庠符節之輕重。使己私耳。亦嘗有一白軍民利病如袁湘者乎。聞者愧讐。自是雖不自行。遣官屬有所奏請。上必曰。若從袁湘所來耶。言輒報可。歲癸丑冬。將適京兆。未至。病歸。人來唁疾。公安之。言笑如平時。夫人問焉。一旦公疾小加于今日。如吾母子寡幼何。惟治命是聞。公曰。吾平生所爲。無有不可語人者。天將後余。是外非若知也。以十二月九日卒于正寢。年五十有九。以某年月日歸葬臨州某鄉某里先人之兆次。凡再娶。元配馬氏。繼配梁氏。子男三人。馬出一人。未名前公卒。

梁出二人克忠。昭勇大將軍隴右河西道提刑按察使克良。提舉太原探木司女二人馬出。伯適定西州尹富察仲德。仲適中部縣尹張欽用。男孫四人。長仕圭。餘未名。女孫八人。在室。十八年。燧以陝西憲副錄囚延安。昭勇君自隴右得告家居。一際言色。固以心推爲鉅人長者。若不見毛髮。比出。執袴習者。古之人有云。觀其子。可以知其父矣。明年。克良持君書與公事狀。謁銘墓碑。因得究公爲人。益自信昔者觀人之不失也。蓋嘗論之。人生紛綸尙武之時。懦者固不能以自立。惟強之依。而強者或徑行而無謀。亦旋取敗亡。善謀矣。其力不足以先衆。則人亦莫之信而爲之使。嗚呼。公以此時克樹功業。裂地而侯。以傳諸子。亦戛戛乎其艱哉。是可以載行事于右。而見白于後世也。銘曰。

繫衰之先。世繼顯賢。由金百年。力本乎田。起培而行。篤公之自。逢時未靖。實艱初試。人求其生。雌從雄鳴。有距跳踉。有翼奮翔。臨泉葭蘆。襟帶河山。公居其閒。撻其悖頑。智資我謀。勇怛吾力。我麾我招。莫不順適。國步未改。効死我臣。天命維新。吾生斯人。府葭延長。綏丹鄜坊。我旗樹降。千里其疆。朝爲逋亡。夕則樂康。人無我敵。束爾矛戟。敏而耕桑。督而蠶織。而方瘡痍。孰爾腠刻。孰驅孰呻。煦手摩撫。隣曰時哉。爰適樂土。寵光不希。鈞言不危。說進可得。丹辰肯頤。不年永辭。延民之思。今三十年。如在柩時。黃髮齠子。枚誦其美。事上之忠。繩下之嚴。生民之仁。與人之謙。顯親之孝。奉己之廉。人一二有公乎其兼。延民之思。日遠則忘。我詩之碑。百世昭章。

光祿大夫平章政事商議陝西等處行中書省事贈恭勤竭力功臣饒同三司太保封雍國公諡忠

貞賀公神道碑

大德九年榮祿大夫平章政事上都留守兼本路都總管開平府尹兼虎賁親軍都指揮使賀公以年七十有二丐老制進光祿大夫平章政事商議陝西等處行中書省事賜白金爲兩五百楮緡二萬五千錦衣玉帶既遂養安其鄉又以其子參知政事勝襲上都留守虎賁十一年成宗格天儲皇削平內難夏五月念舊臣將有咨度俾中書遣使馳傳召之承命卽行而道疾皇帝嗣位下詔萬方其播告使遭諸樊橋以勝參知政事上都留守進拜平章政事爲慶公撫膺感極而薨七月九日也年七十四訃聞三宮迭爲惋惜遣勝馳十乘傳奔赴隨贈恭勤竭力功臣儀同三司太保封雍國公諡忠貞至大二年七月二十九日行在南坡以公墓碑未銘勅翰林學士承旨臣燧撰述之仍俾勝馳十五乘傳入秦身視鑱立嗚呼其榮生哀死始終于公爲何如公諱仁傑字寬甫其先河東隰州人居京兆則由祖選徙考惠賁特降金符京兆總管諸軍敖拉贈輸忠立義功臣銀青榮祿大夫司徒雍國公諡貞獻初歲壬子憲宗國母弟世祖于秦受詔征雲南禡牙略畔之山明年將戒塗貞獻作室得夙藏以白金爲兩二千五百來上曰陛下封國所出臣何敢私願佐軍興又曰臣子生二十年矣力能荷祿請置顏行主將憤其不已白而專爲也幽貞獻長安帝聞之怒縛主將至將中危法以開國世胄而釋公由是入備宿衛經吐蕃曼陀涉大瀘水入不毛瘴喘沮澤之鄉深林盲壑絕崖狹蹊馬相廐以顛死萬里而至大理歸由來塗前行者雪深三尺後至及丈峻阪踏冰爲梯衛士多徒行有遠踰千里外者比飲至略畔最諸軍亡失馬幾四十萬匹後從濟

江歸正宸極。眷寵日加。征伐蒐田。無不從。負御服物。多至一二十事。風雨霜雪。暴衣露處。飢渴戰瘕。未嘗告勞。他人滿直三日而更。獨公與董文忠爲長上侍疾。或一月不至家。燕閒喜訪聞外事。至元十有一年。梅應春舉瀘州降。制卽以爲其州安撫使。明年大兵圍重慶。又明年制使張珪遣王立潛師襲瀘。取之。應春殺戍將千戶熊耳。而有其妻宗。甚嬖之。宗王相四川行院李忠宣之外妹。立後移守合州。行東川院者。則憲宗帶玉器械哈丹庫哩濟蘇二人先朝陟方平此。拔將甘心。故合益負險不下。宗說立遣張邵輩蠟書閒行至成都。請忠宣受降。忠宣從五百人至。立則開壁納之。忠宣以王相罷置其吏而去。東院械立奏殺之。時安西王受詔征漢北。未知合旣下也。自軍中下教長安。遣燧乘傳招之下。則許貸立死。以爲安撫使。而誅立勅使先至。其日將醢之。而教亦至。東院以勅教違行死生異也。破械出立。而幽之別室。相府東院各使再請。宥密以帝有成命。不以教聞。會西院遣都事呂端善他事至京。語公其然。公卽入聞。帝詰宥密臣曰。卿輩以殺人爲嬉耶。使立生至則已死。則汝其從之。驛致立爲合之安撫使。虎符先師許左相多公力能回天還。而立見謝曰。教活臣于始。賀某活臣于終。惟死以報。明年帝怒王府一相大治宮室。凋弊秦民。召至而不敢見。公爲譽釋于中。俾仍相秦以歸。其年內出白金陳御榻前。如所上數。前公謂曰。此卿父略畔佐軍興者。卿母在此。其以是供具爲養。辭之不可。歸請其母曰。君賜也。宜仁吾宗。悉散之。又明年授正議大夫。上都留守。兼本路都總管。開平府尹。又明年授資德大夫。兼虎賁親軍都指揮使。加佩三珠虎符。十九年帝曰。昔從太祖飲水黑河者。至今澤及其子若孫。其從征大理者。亦朕之黑河也。安可不

錄其勞。悉大賚之。于公加恩數焉。年既及艾。侍帷幄日久。事益明習。人以密近。天光丞相而下。猶必咨託。俾調動靜。而始入告。如是而不怙威。不矜寵。不黷于貨。克兢畏。清恪自持。故有言必信。晨夕彌縫。滋多。事祕外不聞。其顯知者。如擇童女實掖庭。命既下矣。公曰。宮妾不足于使令。宜妙擇高門德望之家。端嚴明淑者當之。豈可槩行。以駭天下聽聞。使深山窮谷。擁腫麤惡之子。不待其年。而急相偶。非昭代盛德舉也。又古貢方物。皆其土宜。今者和市。非產其土。一切征之。增直倍蓰。無所于取。吏責後期。從而罪之。實病民甚。又永盈司倉。任文通稅民不入粟。而私給券。取直其外。懼事覺。顧先陳他吏之爲。辨服其誣。當誅。公言。罪許自陳得原者。令也。彼雖誣人。事同自陳。若重加罪。則塞悔過之塗。有言事者。亦將創矣。又袁海爲鹽。由人力以出者也。山後諸州漕司。必遠餽與民。而徵其利。今瀕上都池泊皆鹽。實天惠養斯人者。無有課入。禁不得食。有盜食者。罪當沒產。終不能止。而冒犯滋衆。是爲寀畿內也。帝皆然之。止童女勿擇。物非其土所出。勿和市。免文通死。重杖以懲。鹽弛其禁。民爭德公爲廟。李老峪設像以祀。二十有五年。進階榮祿大夫。中書右丞。以子騰爲中書參知政事。及價格爲尙書省。以威制天下。大爲鉤考。奏公爲留司上都錢粟損失頗多。時其長則國人烏納呼及庭辨。公曰。臣漢人也。是雖非臣盜取。不能戢吏爲姦。罪則在臣。爲之長者則曰。臣司留印。事未有不白。臣能出者。惟當罪臣。四十日中。彼至七十餘奏。而兩公爭自罪。終不易辭。帝曰。受爵而推人者有矣。罪至而爭引歸己者。惟汝二人。其罷勿竟。則公見信于友。而結知君者。非有素。可襲取耶。然計始入臣。以及丐老。實五十四年。掌留鑰者居半。倉廩府庫。一俟啓閉。衛士衣食。亦仰

均賦乘輿歲至比其南也少乃數月頓舍宴享諸王百司送往勞來細而米鹽燈燭大內之中奔走徵呼一日數至其所受委不怠不忘克當聖心未嘗取其逆怒以故資身百備皆出賜予最其多者楮緡五萬玉帶珠衣宴服貂裘華飾可等國人貴臣他珍玩不計人則置之曰不過受也斯其君臣之際交孚然也其家庭則數歲必一歸省于秦既至不可以久一再月則必牽衣流涕而別前夫人劉卒宮中欲女以國人公以漢人不可偶是鉅族娶從聖武西征留使鄭公師真之孫數年而喪明三十年終不以疾而失歡其初無媵侍在旁遇寡嫂嚴而有禮與諸弟雖篤其友必飭其過妹壻不謹宵直至撻之與人交坦白以誠藉位勢以暴人者不下也以其年九月二十有一日葬鄆縣太平鄉貞獻公姚夫人鄭兆次前夫人劉祔公二男四女勝踐公平章又請推恩上及祖考再世國雍其爲孝也大孰加茲與適上郤兵馬使瓜爾佳哈布爾者劉出也最後公薨再月而卒與適河東山西道提刑按察使韓世英子慶今參知政事董士珍子守正虎賁親軍總管楊祺者爲鄭出男孫三慶寧興與女孫二皆幼是正系也其宗從則伯父貞不仕季父斌同知京兆敖拉總管府事四弟義立令同之朝邑禮貴不仕智明管州判官信仲四川南道宣慰副使妹適王權省子貴子男十八人女半之男孫九銘曰

大帝淵龍華臣之逢孰近而初孰久而終爲世所知同公流輩百十維人官出皆外凋喪相繼惟董文忠朝夕帷幄與公友從珥侍中貂廿有六載董先朝露乃眷公在生人于死引慝其躬民瘼之求悉其勞庸位亞人臣晚極其報又爵其子公武之蹈迨歸老秦制曰祿之俾其省臣事諏政咨曾不再稔方銜國恤

震邸見招。竭蹶力疾。大不慙遺。道薨樊橋。五十六年。始終兩朝。今聖曰嘻。奉常汝謚。主爵玉署。汝封行制。凡厥哀死。無後邦經。乃陟保衡。忠貞易名。乃與乃考。于雍再國。若稽夏書。九州有一。餘受封家。孰京與夷。皇上猶以墳道未碑。乃敕禁林。臣燧次述。公于佳城。奚感不足。胥是有扈。左豐右甘。名與不磨。終南在南。百夫長贈中大夫上輕車都尉曹南郡侯坤都岱公神道碑

至大三年。下詔萬方。推恩中外。一日官之先。昉于五品。由庫崇等而上之。列爲五爵。五品四品。由男而子。其封皆縣。三品二品。伯侯以郡。一品則國公。其世數。男子惟考妣一世。伯侯及祖妣再世。國公及曾考妣三世而極。用是中大夫。尙書。吏部侍郎。桑烏遜。職登從囊。旣通以顯。贈其考坤都岱中大夫。上輕車都尉。曹南郡侯。祖庫春中大夫。上騎都尉。曹南伯。祖妣額森特尼太君。妣周太夫人。妻馬夫人。皆同郡曹南。吏侍將修天寵于碑。請燧銘之。故撫太常博士王天祐之狀以敘。在太宗世。欽察猶未附。定宗憲宗時。猶王也。詔與大將河南王蘇布特討平之。其部屬始至中土。上騎則其酋。諸孫隸河南王戲下。長百夫以卒。公嗣爲之。從平河中。下鳳翔。殄敵軍鈞之三鋒山。破汴蔡。滅金後。詔王戍河北。公始家曹之定陶。又從諸侯王扣肯巴哈及大將察韓伐宋。塞出暑歸。歲以爲常。殘漢上之襄陽。郢復德安。援淮右諸州。轉鬪千里。登陣陷陣。斬刈不可識計。幕府犒功。居諸將先。金寶于櫝。衣溢于笥。馬運于櫪。歸則課僮奴耕稼畜牧。隨致豐潤。性儻喜施。時節擊鮮與閭里故舊爲樂。其後戊戌歲。戊午。宋兵犯鄂。率死士出禦。斬獲過當。中流矢輿疾至家。卒。年五十一。葬新興東原。夫人則周亞尹女也。皆柔淑靖恭。婦德母儀。稱于嫺族。子二人。長

烏克岱尹出嗣長百夫從攻襄陽斬項老白都統濟江下鄂定淮浙由忠顯校尉蒙古軍總把錫金符監
真定河南曹州大名翼千戶解職子某次則吏侍從淮安王巴延河南王阿珠濟江元帥府知事升經歷
以給西京河東蒙古軍衣糧鈞賜鞍勒弓矢鈔二千五百千入爲衛士出監武邑真定兩縣真定升州同
知州事進官奉議宣政院斷事官進朝列院經歷驛徵西番負金爲五千鈔八萬五千丁妣夫人周憂依
墓爲廬摧毀自致鄉里孝之尋起參議院事升西番宣慰使虎符入爲郎銓曹從平寧王亂大會供億不
乏賜爵二級鈔二千五百千男孫七忠顯校尉某嗣長千夫買兒河西福興丑妮子巴哈錫都皆幼女孫
八人五歸名門嘗反覆究觀自上騎至吏侍纔三世矣而歷事太定憲三宗世祖成廟前聖今聖七朝雖
不可方開國諸臣亦善承其家者而吏侍尤敬慎寡過有才臣稱銘曰

蓋嘗論刑其極斧鉞誅止有罪猶爲小罰大刑維何無慘甲兵幅員判裂爭地以城淵淵伐鼓陣于原野
入死出生決食頃者嗟哉維公束髮卽戎進退金革奮不有躬于河于漢于淮之亂金滅戡宋勇必軍冠
無眼維矢信不識人不殢懦夫而賊果臣其在兵志士而死轡庶于事君身曰能致雖死已久而名則延
甲子垂周卹章自天亦本孝子吏侍之籍其丁內艱卽墓而舍敕起院參使番西南佩之山節虎視耽耽
入爲郎官銓曹是職日月爲斷當其陟黜矧又兄子方長千夫將久其傳黃金世符門閥之崇有耀閭里
碑以表阡百世伊始

南京兵馬使贈正議大夫上輕車都尉陳留郡侯布色君神道碑

布色氏始由普爾普以佐命功位司空。生司徒巴爾圖。司徒生太尉和賚。連姻帝室。生世宗母宣獻皇后。與金紫光祿大夫統軍巴勒統軍生世宗元妃。與鎮國上將軍布展鎮國生昭勇大將軍守道。昭勇生君諱長德。年二十一。順軀偉觀。精巧騎射。以扈宣宗播南京功。官安遠大將軍。遙領濱州同知。壬辰。義宗播歸德。不及從。其明年。會西面防城提控崔立舉城降。盜發陳州南頓項城沈邱。假公金符。將二千五百人往平之。而劇盜張進犯京陳橋門。又殄之。收盜積菽麥以拯飢民。後從諸侯王伊克南征。殘漢之襄樊棗陽鄆復德安淮南黃蘄及安慶而還。時未改汴梁。拔南京兵馬使。改令中牟原武太康三縣入爲南京警巡使。再爲兵馬使。至元九年。養安其家。以十五年四月三日卒。年八十五。夫人張氏。前卒二十年。合葬祥符縣之某鄉。後三十五年。當皇慶之元。子荆湖北道宣慰使翰文走書燧曰。吾先人仕太宗朝。未大清顯。庭臣哀其驅馳。與翦荆棘。茂舍以招徠。干戈餘民。安集三縣。警斥寇攘于河之南。勞勩三十有六年。與翰文自學仕。略其卑官。惟疏九制王府郎中。令倅開成路。歷知松江漢陽二府。入爲中書省左司郎中。是職也。凡陶冶四海之官。與夫經國之賦議禮制者。皆出平手。非其人有時譽者。不授。翰文得之。其材可知。出同知淮東宣慰使。轉平陽總管。與今宣慰荆湖。父子相繼七朝。請如故事。襲其元墟。制可。贈其考長德官正議大夫。勳上輕車都尉。爵陳留郡侯。妣張陳留郡夫人。祖考守道。太中大夫。輕車都尉。陳留郡伯。祖妣完顏陳留郡太君。翰文故妻暢陳留郡夫人。臣焉叨此。昭融極矣。今也有孫兩人。伯珪季璋。私廟時饗。能執豆籩。足免無後不孝之憾。求可筆是事。國定家之槩者。匪公其誰。故卽汴士張孝友之狀以書。且告所

未知者曰金有天下諸部各以居地爲姓。韋廟病其書以華言爲文不同。勅有司定著而一之。凡百姓金源郡三十有六。廣平郡三十皆白書。隴西郡二十有八。彭城郡十有六皆黑書。其等而別者甚嚴。布色氏于金源次居五。其素爲華望之家。不言可喻。銘曰。

猗嗟之家。其在盛時。奕世三公。男女結褵。不于庶姓。于帝之室。大定哲君。猶所自出。金歷旣祝。一氣之機。無成不渝。無顯不微。存者遺冒。伯千什一。今由子貴。推恩爵秩。祖伯考侯。輕車其勳。郡于陳留。覃及妣嬪。勒詩豐碑。光華孔煜。名與河流。瀾瀾無竭。

牧庵集卷十八

神道碑

領太史院事楊公神道碑

嗚呼。有秦君子楊公諱恭懿。字元甫。其先始鄉耀之同官。中避宋亂。徙美原。五世祖儀。徙今京兆之高陵。與高祖亨再世。力田。曾祖植。祖禮。再世仕縣吏。考天德。擢金興定進士第。由博之聊城。承掾陝西行臺。權大理寺丞。主京兆長安慶陽安化簿。辟令順德之隆德及安化。而安化兼錄事州之判官。三職具脩。積官中大夫。其德其烈。有先師司徒許文正公墓誌言。章宗南郊。爲太常臣。授幣而立。御史將劾不恭。其友曰。大夫習于禮者。名行祕書。盍從而問曰。授坐不立。御史慚縮而止。太常則孫公通祥。實公外王父公。以正大乙酉。生于其居京兆之雙桂坊。童而讀書。記識強敏。日數千言。時艱。從中大夫逃亂而東。不恆其居。于汴。于歸德。于天平。雖開關險阻。未嘗怠弛其業。年十七。侍中大夫西歸。無用于郊。假室以居。鄉鄰或繼其匱。皆謝不取。惟服勞以爲養。暇則力學綜博。于書無不經目。而究其心者。樞衣之徒。戶外滿屢。橫經入間。爲析疑義。源源其辭。若決江河而下之。名聲日延。海內縉紳友大中者。馳書交譽。知之膚者。求觀其文。侈其肆者。以爲鱣堂之席有繼。與其極者。直期以宗盟斯道于將來。時已邃易禮春秋。思有纂述。恥爲章句。儒而止志于用世。反覆史學。以監觀廢興存亡。理亂得失。于千數百年之中。曰。輔治之具。禮樂兵刑。禮樂

非王者果爲不可興行于天下。兵恃以芟暴亂而安元元。刑取其弼教。循本以求。皆仁義之資也。不講之有素。或一旦帥三軍爲士師。貿貿焉不知其方。反受成教。武人俗吏乎。事雖未試。從可槩見其佐王之略。年二十四。始得朱子集註章句四經。太極圖。小學近思錄諸書。誦其言而推其意。嘆曰。人倫日用之常。天道性命之妙。皆萃此書。今入德有其門矣。進道有其塗矣。吾何獨不可及前修踵武哉。窮理以致其知。反躬以踐其實。動靜云爲。一乎持敬。行之以剛健。居之以悠久。日就月將。俟其成功于潛齋之下。自任益重。前習盡變。不事浮末矣。歲甲寅。司徒奉潛藩教來秦。公往見之。際其道德之光。聞其仁義之言。于傾蓋頃。歸心服曰。世烏有斯人之倫。敬事猶師。而司徒友之亦至。分庭而行。抗席而坐。一遇講貫。動窮日力。而所造益深。平居詁于爲言。喪中大夫。絕口水漿五日。喪葬用牲。盡祛桑門惑世之法。爲具不足。稱貸益之。棺槨皆黃腸。衣衾必緇。疏衰饘粥。悲憂爲疾。杖始能興。司徒會葬歸。語學者曰。小子志之。曠世墜典。夫夫特立而獨行之。其功可當肇修人紀。聚居六年。司徒束歸。喪妣夫人。猶中大夫。其疾益阨。三輔士夫。知山禮制。自致其親者。皆本之公。先是宣撫司行省欲以掌書記共議事祿之。皆不能屈。至元七年。詔司徒由國子祭酒。拜中書左丞。始與右丞相安圖共政。日譽公賢。丞相以聞。十年。上遣協律郎申敬來召。疾不能行。十一年。儲皇下教中書。汝如漢惠聘四皓者。其聘以來。故丞相遣郎中張元智書致是命。其冬。下車京師。上遣大臣勞其遠來。他日入見。上問何鄉。先德爲誰。從何師學。于今有幾。無不周悉。其夕。嘔血。上遣尙醫來候。且賜之藥。少閒。明年正月元日之翼日。上御香殿。以大師南伐。使久不至。方念之深。欲筮之時。以日。

者待詔公車百十爲輩。獨以命公蓋以其道德素著可交神明者。其言頗祕。侍講徒單公履請設取士之科。詔先少師文獻公司徒竇文正公與公雜議。公上奏曰。三代以德行六藝賓興賢能。漢舉孝廉兼策經術。魏晉尙文辭。而經術猶未之遺。隋煬始專賦詩。唐因之。使自投牒。貢舉之法遂息。雖有明經止于記誦。宋仁宗始試經義。亦令典矣。哲宗復賦詩。遼金循習。將救斯弊。惟如明詔嘗曰。士不治經學孔孟之道。日爲賦詩空文。斯言足立萬世治安之本。今欲取士。宜敕有司。舉有行檢通經史之士。使無投牒自薦。試以五經四書大小義史論時務策。夫旣從事實學。則士風遠淳。民俗趨厚。國家得識治之才矣。奏入。上善之。丞相每咨世務。倚以自毗。會其北征。公遂請畢男婚而歸。十二年詔改曆。太史王恂總算。同知郭守敬推測。司徒明曆理。或言公嘗推曆終一甲子而得日月薄食者七十有奇。曰日月之眚古無是之多也。十六年召公著曆義。十七年授時曆成。奏曰。黃帝迎日推策。顓頊載時象天。堯之欽若。舜在璣衡。周太史正歲年以序事。皆曰官世守其業。隨時占考以與天合。暴秦焚書廢古。僞作閏歲終兩漢因之。建曆之本必先立元。元立然後定日法。法定然後度周天以定分至。賈逵譏其守一元不與天消息。杜預謂當順天以求合。非爲合以驗天者。皆確論也。臣今治曆廢曆元日法析舊儀六合三辰四遊而異之。省天經黃道。惟用四遊。移天常赤道遊于南軸之下。以取候視之無望。倍八尺之表而五之以影符進退其晷。使不失于芒忽。日日測考。積月爲歲。積歲爲世。必于曆法益精益密。非但正數十年一改之弊。且可上追黃虞三代之舊矣。又曰。一月之始。日月相合。謂之合朔。漢太初曆用平朔法。小大相間。或有二大。以故日食或不在。

朔先後一日時亦鮮中宋何承天測四十年得三大二小以正朔望使食必在朔隋劉孝孫劉焯爲定朔唐傅仁均取以造戊寅曆貞觀竟改從平朔李淳風造麟德曆得四大三小求避人疑閒以平朔又爲進朔使食避元日一行造大衍曆以爲四大三小何害今授時曆後是二年當十九年自八月後四月併大實日月合朔之數皆改從實方奏太史臣皆列跪詔獨起司徒及公曰二老自安是年少皆受學汝者故終奏皆坐畢其說亦異禮也授集賢館學士大中大夫兼大史院事明年以徙家得請歸又明年儲皇俾靈臺郎岳鉉召後中書諸相承旨李濤儲皇不可以公爲識治再召又明年詔翊儲皇以爲太子賓客二十二年召明年以昭文館大學士正議大夫領太史院事召二十九年以耆艾議事中書召皆辭疾不行三十一年疾亟親賓問之忽長息曰有是哉國衰也聞者危之亂以他言徐又曰誠哉後三日顧言子寅曰敬慎小心以卒實正月二十有五日後嗣位詔下則賓天果以其日人以爲平生與國至誠所格嗚呼使入哭者有如溫公則公當亦如呂誨起言天下事矣徵士蕭艸誌其墓曰朱文公集周程夫子之大成其學盛于江左北方之士聞而知者固有其人求能究聖賢精微之蘊篤志于學真知實踐主乎敬義表裏一致以躬行心得之餘私淑諸人繼前修而開後覺粹然一出乎正者維司徒暨公嗚呼誠知德不易之言哉後十年寅以江南行臺監察御史疾得告去自金陵過宣以燈少受知公而耳其雅言求銘墳道然所貴乎君子三焉者德耳位耳道耳得于心之謂德用于時之謂位行其學之謂道如艸之言同其德矣未及位也以年考之司徒之生前公十有六年入見前十有四其卒也前十有三而卒官皆昭文館

大學士領太史院事。同其位矣。然是位也。皆極人臣之亞。爲古八命位實行道之鉉。謂不得君知名而召。既至。則溫其玉音以勞。疾則尙醫。交候饋藥。大官續膳。疑政賜問。人見坐語。聞辭則留。留而不可暫聽。其去。去而思之。復召。司徒十召。公八召。其禮貌之亦至矣哉。如是而兩公迭爲循牆。不可謂道之行亦大也。雖然。天道遠。遙不可以已事而知。必來者始見。猶農夫焉。未有播粒于土而不苗者。今也四海匪獨士子。凡筐篋之吏。求售于時。其誦而習。亦先四書。蓋天理同根。人心誦其言而衆。則爲其道者將多。非兩公肇是太平之基。其誰力歟。斯古之人。所以重歎其善作而不必善成者也。公以卒年三月。從葬中大夫之昭文。有潛齋遺藁。高祖妣齊氏。曾祖祖妣皆紀氏。妣寇氏。孫氏夫人李氏。以柔嘉作配。君子姻里德焉。三子寅。其冑也。宙。今令京兆蒲城。宏。方學。女子子四人。適主京兆長安簿。席貽士子馮嘉。鳳翔提控按牘王繼述。樞密院掾傅昱。男孫億。女子子二人。長適呂曾。幼姆。銘曰。

維天生賢。匪使自有。俾拯烝民。爲責已厚。公于明命。實肩實負。乾乾其行。良其守師。古喪祭如禮不苟。三綱之淪。我條白手。推得其類。無倦誨誘。學者宗之。西土山斗。鳶飛魚躍。潛齋自節。令聞之延。已徹宸黷。束帛戔戔。賁及林藪。丹辰曰來。何暮汝叟。大師之南。倅斷已久。其宜進退。汝善以叩。又曰多士。文字儷偶。求得碩才。奚策以取。又曰歷義。羣喙紛糾。汝折衷之。其從誰某。凡是大正。無不可否。公拜稽首。瀝膽悉剖。丹扈曰噫。惟茲儲后。端本萬邦。汝賓以友。儲后曰。今識治黃耆。惟汝爲可。肱股元首。公益抗章。臣早衰朽。養安踰紀。僅止中壽。歸從先藏。奉政之阜。止阡有碑。無我樵櫟。垂詩千齡。以告爾後。

鄧州長官趙公神道碑

有虞臣柏醫佐舜調馴鳥獸賜羸姓其後費昌去夏歸商爲湯御孟獻中衍爲太戊御至周造父爲穆王御服盜驪騶騶綠耳之驥西巡樂而忘歸徐偃王反復御日馳千里破徐賜趙城爲趙氏其子孫散居何里傳次幾何至公者不可稽然由所記憶其先家代之繁峙金亡去其鄉凡再徙始爲冀之衡水人又爲蔡之平輿人天興癸巳之棄汴播蔡也公以善射足力材兼衆難倡義兵數千爲帥聞天兵圍蔡急城中糧絕乃率部曲發平輿富室藏粟負擔疾戰百死突圍上餽召見行闕嘉其忠勞敕銀符提控復潰圍還保平輿明年甲午金亡將戲下步騎數千下宋時襄陽開制閫改信効左軍統制制閫後厭降將多恐聚此叵測漫爲受犒欲致盡阮之太尉江海策曰且人窮而來歸誅之不義又吾閫所節度四十五軍半北人今此加誅則吾軍北人各有心矣徒足啓猜長亂漢北之州獨鄧近去吾閫程再日耳北與敵鄰乘彼虛棄未戍盍遣是衆先之在彼有生降之德在我有復地之利一舉而得兩者也閫然之別遣路鈴哈雅實克將若干千人爲監來戍至則與實不相善益憤前吾所好相下而顧不容將以計誅又一軍譁諜皆言制閫不足爲盡力會明年乙未十月天兵略地漢上集將佐南門商戰守宜公扼劍前衆曰始吾下宋正求活我戲下數千人與若妻孥而制閫欲一切以計殲之情露而事迫者數矣今幸出戍不獨任吾別將監之一旦誣以他罪盡無吾類覆掌不難爲也誠不忍與若泯泯膾肺寇手必歸皇元後應者斬統領徐海獨辯不可立斷其首以徇一軍皆呼拊受命馳造實營執以出盟令呼宋兵投仗脫甲吾不犯若

一人盡歸之襄陽。如輒肆動。皆誅死。實駭汗失常。目眙。舌橋。然不能下頃。不得已。乃親呼其軍。如所教者。于是皆受命。復與將佐爲約。是州生齒十萬。今日之事。將求生之。非固苦之。將思完之。非固離之。衆曰。生完之耳。雖苦何爲。公曰。若旣相許矣。其無殺人父兄。而臣妾其子女。以利貨財。與懷復私怨。衆又曰。不越公命也。乃開門納吾元兵。事成終朝。肆不變市。爲具車馬。遣質令將其軍。盡還之襄陽。少不怨制。闔昔者圖己。而甘心此軍也。居再月。太宗爲太子。南征遠過。教以是城。甚近襄陽。虞力孤。不能自完。且歲荒。與均唐三州民徙洛陽之西三縣。鄧治長水。均治永寧。唐治福昌。許公權宜行省事。乃先勞分苦。佐乏藥疾。剪棘墾萊。府寺田廬。於粲一始。明年丙申。襄樊亦徙洛陽。其年公入覲。特賜金符錦衣。許出戰督軍。入守字民。別降銀符八十。金符八。以酬從公將佐同力者。奏洛西歲又荒。乞歲得大名軍儲米爲石四萬五千。陝州鹽爲斤若千萬。以廩餓人。制可。如是資食二州三年。後歲登乃止。辛丑。授鄧州長官。奏以弟將州兵。亦可。而是州兵民始分。後十二年癸丑。在先朝。今上以太弟之重。命故丞相史忠武公經略河南。始屯田漢上。張平宋本。盡還爲徙鄧均唐襄樊五州民實南。公始復鄧。時宋已築襄樊均。皆宿重兵。徙民各歸其州。惟是三州還者。無所于歸。襄樊僑治州北。均僑治西。皆倚公爲援。南州數十里。淪爲盜區。戰外耕內。四年之間。積穀石七十餘萬。丙辰。乞骸骨。不報。明年疾卒。實丁巳。春三月。十有四日。年六十有一。其月二十有四日。肇瑩州東南之曲。專里以葬。自喪及窆。祭哭聲振城野。數萬人。昔受公生之死地者。公諱祥。字天麟。魁貌碩躬。望之威如。孝親友弟。及有地方數百里。秉鉞垂符。常布衣韋帶。纓冠弊鞍。江漢大都督爲言。

衣冠貴賤章也。何乃爲是過儉。下自同庶服耶。不恤也。與將佐言。公府則吾節度。汝不可不嚴名分之守。私處則汝皆少所從起。相習者。豈可遽修邊幅。改度平日也。必齒坐序飲。其疏簡目節。直坦與人不疑如此。考贊妣李生子二人。長公弟彥。卽將州兵者。大考仔曾大考康三世連不仕。饒贊樂施。夫人霍以賢聞。子一人。昭勇大將軍。保甲萬戶。侃金。鎮衢州。男孫三人。伯元仲亨叔利。女孫四人。適耶律弼。李友端。劉仲溫。季幼。槩公之始。遭金季年。出無受知。託援之臣。入無素勳。可藉于家。奮其孤身。百戰前驅。積勞而加數千健武之上。亦何壯也。且人之才。相爲十百千萬。不能齊同。以一人當一人。爲衆人以一人絕出千萬人之上。是曰俊傑。方天定命昭昭。而昧者疑所適歸。彼千若萬人奔走爲依。求以自全。其受是依者。內揆無可出險反正之才。豈以一身貿貿先衆徒死。則依人者。猶不難于爲人依而受者也。金旣隕祚而後。將十餘旅之衆下宋。其志仁此人也。及宋不察。將快其肆毒。已乃北戍鄧州。爲置監將防虞而戒備之。其伺釁竊發。不保其終何如也。非公謀斷灼知。改玉安能轉禍爲福。侯食此州哉。然由公而上。不仕三世。潔實儉勤。積累悠長。能散宿居。芑後之功。旣傾旣豐。而始大興。此勢之必至。理之固然者。今侃也。卽基堂之龍盾虎符。列名平宋功臣。非公作則之報而誰。諸孫繼繼脩偉。則是澤也。夫豈一再傳而可遽艾之耶。後葬三十有二年。至元二十有五年。戊子。侃自衢遣叔利五千里持衢學官鄭怡所撰行狀走鄧。請述墓碑。燧哀其志在揚厲先烈。又嘗家洛西。與我先人居相邇。而遊相好也。故不終辭。銘曰。

穰之東南有堂其封下爲平輿趙公幽宮返是之年周甲子一束髮樹名古人自必翊將衰祚偶方興時

如鬪孺子。賁獲是支。金鼎沈淪。提是窮旅。曰奔與國。涉漢南驚。來戍是州。始脫危阨。乃棄衆星。日月再瞻。甫少康蘇。燠螽薦疹。徙北就豐。于洛之汭。洛凶亦然。移粟大名。以及還南。保甲戰耕。與是州民。耄穉十萬。形影相附。千里往返。厚深之仁。崇阜增川。宜是州民。戴爲二天。朱邑桐鄉。古弗是過。卜置家傍。萬家且夥。有子將軍。方耿烈光。虎節斯皇。孰曰公亡。匪銘伊白。匪石安邈。我筆載茲。後來者頤。

提舉太原鹽使司徐君神道碑

至大三年。中奉大夫。僉樞密院事。徐毅。感言于燧。吾先人以雅善。故御史中丞王博文。當其爲河東山西。提刑。丐銘先祖。提舉府君墓碣。中丞不讓。而援翰。昔毅與子。嘗受業太傅許文正公。于胄學爲同門。今子長翰林。毅僉宥密。爲同朝。爲先人于中丞。無是也。又子亦識吾先人。古所謂知死知生者。兼有之。其遺善可筆以示雲。仍者。非子誰賴哉。乃序之曰。君諱德舉。字進之。曾祖澤。妣郭。祖閭。妣邳。世農平陽趙城。以本富聞石明里。考玉材。武爲皇帥府提控。提領崞縣。岢嵐州長官。後馬公行刑部。奏提舉河東南路常平倉。妣夫人高。以歲丙戌生公。數歲撫而謂曰。是吾父登金詞科。令岐山出也。身教之書。及長。又資使學士。俾歲偕計吏趨龍庭。甚爲參尙書省議樂齊賢。馬文玉二人者。知擢以爲掾。己未。遣迎世祖于江北陽邏。且徵兵山之東西。中統壬戌。省調平陽路轉運司經歷。以妣夫人憂去官。後六年。又居考提舉府君憂。安西王國秦。凡河東河南山之南與陝西。食解池鹽地。皆置使督其賦入。悉輸王府。以君爲太原。舊由其地炙鹵民盜煮食。有司雖密其禁。犯者終不衰止。而賦日益不登。遂弛其禁。聽民煮食。惟戶責輸賦漕司。行習。

久矣。至于都漕欲變其法。復轉鹽鬻民。君以爲若然。是驅是邦人納罪罟也。若仍弛其禁。惟衆遣吏巡迥。不使賤估盜販出境。而加賦其舊三之一焉。民便安之。而績亦最。陞提舉。棄而不仕。其平生履歷已此。不可謂達而名。傍聞四方士夫從之遊。公侯用其言。而人亦樂以急難見求者。在夫重諾而趨義。負氣而尚俠。其事如李璿將爲亂。自益都傳檄求臣叛王。而平陽總管李穀不思移文太原。爲忻之監州。恩巴楚所發。故兩總管皆誅論。穀子青童尙孩。坐徙遼海。君哀之。帥穀家僮訟之宥密。以爲祖宗之法。父子罪不相及。且昔檄事青童何知。與禍至茲。甚非昭代罪人不孥之旨。宥密遂奏遣之。今戍四川。長萬夫。襄陽既下之明年。將平宋。詔籍中戶爲兵。民甚駭愕。至有自戕求脫者。總管烏塔患之。迫君詣宥密。受其成法。得于三戶抽一。遂懷檄歸。虞吏爲姦。教侯取籍。閉府幕道院。身自差第三戶優劣。優者爲兵。劣資其力。令出人稱爲平。有泣謝者。初世祖征雲南。師未及境。書遣三使諭招。三人者言。祖宗之法。殺詔使者。城拔必屠。萬一變夷怙惡。或賊殺臣。願無以臣而使。是城雖無遺類。至則彼以爲誕。皆殺之。懸尸于樹。大師既至。求其首。或謂投洱水中。遣漁人網取。無所得。火其骨。函送二家。復其門徭田租。中一人秦州士子王姓。分蠻口數十于州。俟其子壯。付之後。三十年當歲丙戌。詔西省臣訪求三家在亡。蠻口已爲郡豪張某者冒。有王氏子願受。其人傭直。君言之憲府。坐郡豪以罔受上恩。官吏見知蔽匿者。皆罪黜。而還正其口。王氏子民奴有嚴姓者。主利多直。鬻其六七男女于商胡。君憤然曰。奴有男女若是衆多。則知賴其爲力也久。忍重奴商胡分鬻他地哉。白其府曰。主既有名郡籍。則奴亦郡民。烏可不告所由。而輒鬻之。縱不損吾戶數。實

損吾口府是其言行已數舍遂追還之代贖爲民猶其外者至語其家衣止大布大帛食無兼味飲酒不數命事繼妣石有孝譽分田以恤女弟孀居爲子擇師俾齒膏學其知親賢又如何也恆言以飭諸子曰立身本學治生本力穡儉勤義以周匱急無多積以自災取友不可苟合勢利臧獲久故旣火其券多至千指自今事汝久者其縱遣之當不恙時伐石爲槨穴地倍常有半曰他日無厚藏明器用陶無法流俗侈靡崇事浮屠以大德癸卯八月六日卒年七十有八九月二十有八日葬石明里先塋以前卒二十有一年元配同里毅母盧夫人附置毅爲治書廉使風紀中外刑曹惟觀今爲內總六師外制諸軍遠及萬里爲贈祖玉嘉議大夫上輕車都尉平陽郡侯妣高侯太夫人考德舉太原鹽使司提舉贈中奉大夫護軍平陽郡公妣盧妣邢皆公太夫人非文賢而能之乎繼妣邢夫人生投轂毅濟投宿衛成廟毅掾河東憲司毅大都永濟倉使與濟皆不祿女歸江南諸道行御史臺治書裴居安男孫四人女孫四人銘曰嗟古君子許友以死非父母存曾不有己後世不然輕合權輿饒酒以金矢死不渝小棘見告聞已掩耳大而去之遠若讎恥允義徐君閱其故侯世業塗地而身亦劉童子何知亦遐以置曰是聖代開罰及嗣教訟于庭萬里還之俾克再家虔秉將戲民有不幸爲勢壓抑無待籲求我則往直謂爲非俠力善砥名謂之爲俠不蹈難行其居而家井有條理施以裕人自奉則菲伊誰無子無不欲賢師匪其人學則滯偏遺毅齒冑從許文正耳其嘉言曰其善行故出用世尊聞行知爲民所望宥密贊毗不昌其身而昌爾後逾信百年種德始茂子貴而碑令甲得爲可恃以傳太史友辭

戍守鄧州千戶楊公神道碑

楊公諱義珍。世汴之杞人。曾祖考某。祖考某。考真。皆不仕。金垂亡也。鄉里及旁縣豪傑。以公質而義。沈而信。脩幹有力。馳馬引強。奔走服屬之。至有二萬衆。將之來歸。授萬戶。徙河內。定興。思立戎勞。不樂民治。宋將彭義斌侵山東。東方諸侯。皆壁不出。犯其鋒。或聞風景附。始將百人。從故張蔡公戰淮北。復徐邳兩州。勞。陞將千夫。戰淮南。破光廬兩州。及安豐軍。戰漢上。拔光化。棗陽。先登。又破信陽軍。戰襄陽。走王總。管牛首山。斬張太尉鹿門。破荊南沙市。初鄧旣降。以歲荒。盡遷其民。就食洛西。留公來襲。戰塔橋。古邛陁。屢軍戍守。會故中書左丞劉礪故宅岡。將趨襄陽。率步騎北之。其後山西逋民。由雕汝可去父母邦而南耶。與故遮止之。假種牛曰。吾在此。兩堰以灌屯田。歲收粟爲石。中書平章游公。築楚鐵狗無慮若千萬。沾饑羸爲口。亦無慮若千萬。歲甲寅。以平生小大數十戰。身被三創。老厭苦兵。子珪。能荷父矣。請憲宗朝求嗣。已授副千戶。得休居十三年。以至元乙丑春正月十有八日卒。年七十。其月二十有九日。葬州西北十二都之靈德鄉蒼龍潭壩。夫人同縣盧氏。後公卒之二十五年。當至元二十六年。歲己丑。年九十不恙。珪及其三季秀成玉。與男孫十有六人。興祖世榮。欽祖光祖。述祖崇祖。儀祖遵祖。協祖繼祖。孚祖襲祖。康祖恭祖。由祖亨祖。女孫十有八人。男曾孫五人。僮僮侃僮僕。女曾孫八人。最三世子孫。曾孫男女已五十人。男婦。女夫甥孫猶不列也。朝夕若歲時。問安爲壽。其前堂宇隘。不能容班之庭下。人之望之。蔚爲盛門。非天章公潛德昌熾後裔而何。況珪克對前修。有光乃爾耶。始有副千戶江漢督府版令將突騎千。時宋宿兵

襄陽與君犄角臨鄧。督府度房有恃而虛。別遣將以萬人襲之。反爲均兵遏絕。令將所突騎爲援。戰分道口。斬其副將杜胡。又戰馬嘶山。通道出之。從史經略援蜀之開達兩州。戰李義聖耳諸山。又戰同波砦。萬石壩晉城寺。獲生口五百。城母德章以拒合州。又城大軍平以闔廣安。軍歸。從故中書左丞相阿珠公圍襄陽。戰小偃堡。南漳。鴉及八瓣。凌三山。禽解都統樊提轄湖城砦。馬軍趙總管野鵝池。劉都管胖山。問探司王總管猪子川。又禽無名將樊城。戰六年。襄陽迺下。勞授敦武校尉。從中書右丞相巴延公越安陸。戰新城。降黃宣慰。阮沙洋邊都統火死。下沔陽。攻漢陽。先登拔之。戰鄂之陽邏步。獲船五十五艘。遂濟江。下鄂。又從故中書左丞相阿爾公分兵而西。戰荊口。降高安。撫下岳。攻荊南沙市。先登阮之。徇地峽州。下之。鄉民多趨險奔施。擇峽屬縣宜都富民言能動衆聽者駱升。署爲邑令。追還五千戶。從圍潭州。戰西門鐵壩。三先登。進武略將軍。千戶金符。從下衡永全道四州。拔靜江。進宣武將軍。總管虎符。下柳西融州。徇地海外。未至。召還。進明威將軍。副萬戶。再遷廣威將軍。眞爲萬戶。戍襄陽。最其受任。至今三十三年。所援拔破阮下名城三十。而縣不與。禽邵統一人。總管三人。斬州副將一人。降安撫都統各一人。討湖南叛寇生降渠首四十五人。所全脅從及城拔而當殲。言之大將而脫者。不可以鉅萬計。小大之戰七十餘。身被者五創。矢分右巨擘。洞肩汰股貫踵。先登壓陣而顛。血嘗出口。積是勞勩。位踐三品。力有可至。數所得爲。伐石人獸樹列神道。又悼公平生與國立家之多艱也。不銘之碑。無以白悠久。自襄走鄧。託筆于燧。嗚呼。臣之事君。猶子事父。雖出蘇武告李陵之言。而千載以爲得。然事父敬身。事君致身。道固有不悖並行者。曾

參將死。召門弟子啓手足以示全歸。其平居則又以戰陳無勇爲非孝。夫小而殘形大而隕元。至不旋晷。孰速戰陳。苟于是而曰吾全歸。吾全歸。則天下無授命之臣。君何賴以守邦。人子惟無事戎行。不善將身以死者。是成不孝。而執綏援袍以死。固其所也。況戰不必創。創不必死。與雖死而名日延哉。嘗讀史氏書。見鬪將之登陴陷陳。折馘擐旗。大者百戰。小者數十。其身所存。鋒鏑遺餘。必慷慨感發。思有若人者。生今之世。得奮筆大敍其雋功。亦志士千古之一快也。觀公父子踴躍金革。視身外物再世一轍。庶其人焉。惜吾文之未稱副也。銘曰。

世曰文士。武弁之易。謂勇無謀。似而非是。讀人物志。論第英雄。英之精秀。草木華同。雄譬健獸。逸羣振迅。天於恆人。此與彼吝。或畀其全。萬邦表貞。英故明智。雄則勇能。人才文武。異同胥附。武遏亂略。文太平具。亦旣太平。忘戰必危。猛士赴敵。生死斯須。彼文維臣。何有是戚。執簡之評。其可輕出。於鑠維公。鄉豪始宗。無基于前。造大今躬。金歷祝斷。有衆二萬。來歸太宗。獨何是亂。棄民而戎。轉鬪淮漢。戍鄧控郛。招逋立閉。鄧人病饑。我往耕之。鄧人聞戒。我往戰夷。丐老而休。年宜延夥。而止七十。元宅長臥。生子如公。亦毅能兵。克越蜀荆。三十名城。金石所創。凡十五嬰。虎符以庸。鈇鉞專征。曰是徵效。先人之教。五鼎三牲。不享榮報。發其幽光。葬令存章。庶幾子心。少慰靈傷。切雲之碑。蛟奴龜負。史臣是銘。滋久無斁。

牧庵集卷十九

神道碑

參知政事賈公神道碑

賈氏之顯。在金叔世。由大考銀青榮祿大夫。上柱國。尙書右丞。河東郡襄獻公。諱守謙。相宣廟。故曾大父。衍金紫光祿大夫。曾妣石。其夫人焦。皆從封河東郡夫人。考頤。武節將軍。兵部主事。蔡州觀察。推官。生公。鄭州年十五。汴亂。已失兵部。奉妣夫人孫。踰河。依舅氏居天平。甫及冠。入官行臺。于時法制寬簡。凡受事者。惟以賄先。或餽黃金爲兩半百。峻絕不取。太宗聞之。稱其清慎。特勅有司。月給白金爲兩百。世祖淵龍。驛致諸邸。與語合意。俾董城上都。竟工。丁妣夫人憂去。及踐天位。首以爲中書左右司郎中。不名。惟官命之。坐政事堂。位宰相下。他爲郎者。莫之與班。由善國言。小大庶政。不資舌人。皆特入奏。其冬。帝自將討叛王漠北。漢人惟丞相史忠武公及公二人者從。歸賜西錦服。賞其周旋。莽閱鞍轡之鄉。不懈益勤也。帝問卿郎俸幾何。公如數對。則曰。何薄如是。勅增之。公曰。品制宜然。後太保劉文正公奏。公參知政事。公又曰。他日必有由郎援例求執政者。將何爲禦。皆不許。至元始元。官朝請。參議中書省事。詔同燧先世父太師文獻公。時以中書左丞行省河東山西。罷世侯。置牧守。五年。再爲左右司郎中者三年。盜殺臣爲平章。欲擅利權。病其束手中書。不得肆欲。奏求分六曹繁務。立尙書省。授公中書給事中。丞相惟署制勅而已。隨

同兩丞相史公耶律公潤色國史翰林。十年襄陽下。詔令卽汰生熟券軍。隨授知襄陽府。府隨陸路官太中。襄陽路總管虎符。明年詔淮安忠武王巴延時以中書右丞相河南王阿珠以平章楚公阿爾哈雅以右丞行中書省。將圍襄諸軍。濟以新籍之兵。合數十萬衆。平宋。授公宣撫使。議行省事。浮漢濟江下鄂。大師其東。留右丞及公戍鄂。明年授僉行中書省事。荆闔遣安撫使高世傑來襲。右丞出禦敗之。降世傑。乘銳下岳。進拔江陵。又移軍圍潭。獨公留戍。士民求見者。前其人而卻其贊。金帛一錢不入其門。酒茗之微亦絕。戢吏卒無入鄉。敢縱暴者。刑以重典。發庾賑饑。宋宗室仰食官者。乃廩之。不變其服。而行其楮幣。弛湖荻禁。聽民漁樵。東南未下之州。商旅滯此者。給繻歸之。創舟百數十艘。操以水軍。免括商民。置藥局。遣醫更視疾瘵。婁安邦以信陽來歸。從其子入覲矣。裨將陳思聰屠其家。逆端則見。或議加兵。公曰。爲是益堅其叛。惟可計致。遣朱千戶從十人往。使戒無操兵。好謂之曰。汝與安邦同功有怨。盍明之省。何俟其出而屠其家。或仇黨夙夜甘心于汝。奈何。宜身自省。告余以故。余則直汝。不然少猶豫。則以叛加兵興誅矣。思聰果來。隨徵其妻子。其徒至數以戕賊主帥家。與未受使言迎。射殺其從二人。罪併肆。其子諸爲亂于市。幼主旣降。其相陳宜中文天祥挾益衛兩王逃之閩廣。爵人號年。東南大蠡。覬倖之徒。相煽以動。大或數萬。小或千數。在在爲羣。漸寇起。司空山。剽黃及壽昌。壽昌距鄂尤邇。鄂屬縣傅高亦集衆跳梁爲應。公多爲檄曉曰。汝皆平民。爲賊驅脅至此。俘殺之獲。子女貨財。渠惡悉有。汝何利焉。捐父母妻子。徒受叛逆之名。以取族爲鄉里所醜。今能投兵返其居者。復齒平民。不蹤迹其既往。有斬賊首至者。以級多少受賞。

以渠首至者。官之言中其情。上下猜沮。稍稍離渙。壓以官軍。遂盡株概。翦平無留。高亡之江西武寧。公又檄敢舍匿者。誅及其鄰。窮無所歸。變姓名返家。爲尉吏縛致磔死。初遣萬戶某者。討是賊。其人願以高爲辭。請急盡殲鄂之豪傑大姓。以絕禍本。公曰。應賊者高。鼠子何爲。旋就梟夷。豪傑大姓。初無與知。奈何以高誣誅。逆天欺君。以禍民夫。誰敢然。汝第往。吾能必其無他。其人出。留所善部將戒曰。聞吾還軍。汝舉烽城樓。內外合發。必盡殲。是會其戰不利。水死。其始事彰。鄂人大恐。轉益德公。特爲司命。時精兵盡于圍潭。居守半老疾。乃雜新民乘城。民相誓曰。設寇誠至。吾曹二三千人。必無四顧其家。專擁衛賈相。十四年。官中奉湖北宣慰使。明年。授參知政事。無幾時。遷江西行省參知政事。民素父母愛而神明敬之。號送其去。像事于學。先聲至江西。民有迎訴千里外者。時其省收海隅僞命甚急。有者坐以連賊。無者謂爲斬匿。將爲後用。誅論巨室。踰三百家。猶有幽獄未斷者。公至。出其非辜。下令凡宋告身。以城來者。朝廷旣加其舊官之矣。自餘蓄此。無所紱復。徒自取禍。其悉投水火。敢有以索兵仗爲名。俛入民家。罔爲收匿。以起獄取貨。與取妾人子女。痛繩以法。明年大水。壞民廬室。藏蓋者。發粟以賙。其逃登屋木者。遣吏具舟載糜粥糗糲。以食。脫沈溺數萬家。宰相出入。以甲士導從。至省班立庭下。其冬大雪。墮地旋消。移時不能滿寸。右丞託爾楚勳貴胄也。顧謂公曰。南方並有北寒。減三月。公曰。相公襲貂裘。熾炭其前。而張幄于後。言是則宜。彼庭立者。必以爲加三月矣。右丞屬觴于公。謝其失言。休士于廡。由是知其爲心。斯須不忘恤下也。事必資決。不敢友視而師之。明年。李梓發盜。據南安。公虞他將往。則爲暴堅其不下。請身往平。纔從兵千。營于

城北爲檄推誠招懷梓發度其猖獗日久勢不敢歸以其徒知公有素或貳其操戰不爲用懼左右竊取其首爲功乃閉妻子一室自焚死衆皆散還其鄉不戮一人平南安歸江東饒之屬縣都昌杜萬一挾左道媚人有衆萬數狂僭置相公曰都昌與吾南康止限彭蠡此寇不滅將亂南康乃調兵戍遏彭蠡西灝別遣方招討將其軍伏仗舟中僞爲商農徑造菱舍生禽萬一與其相曹者以歸磔龍興市其徒散駭復其民居後有列戶室姓名百數來上云與賊連公曰大恩誅矣延求何爲火之而江東宣慰使某者媚其成功遣使人讒公不俟江東兵至惟遣南將往討私有其藏以八月屠禁日殺人會公亦遣使至制則江東使曰賈郎中爲者何有過差且是賊非羊豕人也雖殺以朔日猶可十七年詔再征日本賊江浙江西湖廣三省造海艦公極言如是將亂江南欲身任人聞陳其過舉他相以爲不可廢閣詔令異同之間其年七月二十日年六十三薨于豫章而始成戰艦遣宣慰某者總致于軍東征丞相憤失軍輿將以是日斬使忽詔下旣江西海艦後期罷兵君下謂公薨猶利國如古尸諫以其冬十有二月歸葬威州井陘牛山先塋嘗最其平生家居事妣夫人曲極孝敬迨薨移是以養寡姊夫人李氏信氏雍睦無間言視政之休未嘗廢書從戎亦囊駝負書以行從討叛王度漠有暇猶爲世祖陳說資治通鑑納君于善延師私塾毓德諸子日或至其舍出門交友貌粹而言溫侃侃易直無有城府機穽尤篤故舊故第邇太室歲常以十月剛日大享其日每風雪沍寒非執豆籩聞鐘鼓振發不敢安臥其室冠服庭立至乎已享積學其躬如是施諸用世事世祖二十有一年其居中當睿聖大有爲之時與二三元臣上以毗贊其經國下以變

熙其子民者十有三年。出而經理南紀。謀猷大軍。于襄陽。于湖廣。于江西新造之邦。嚮化未純。安而集之。煦而濡之。如恐一夫不獲其所。一有海隅之難。盜賊附起。禍讐而賞勸。德綏而威撻。徐革其面。而浹其心。俾方三數千里之氓。一喙同辭。稱其仁人。求能推守大帝諭忠武王以曹彬取南唐不殺之訓者。無公亞匹。嗚呼。後公之薨。二十有九年。今聖言念盡瘁大帝功加生民。贈推忠輔義功臣。銀青光祿大夫。平章政事。定國公。諡曰文正。哀褒之典。無一遺者。恩重書棺。公而歆茲。可作于九原矣。五子鐸。淮東宣慰使。鈞中書省參知政事。鉞。不祿。鏞。令曹之禹城。鏐。知鹽官州。二女適臨湘。令劉彧。僉山東道肅政廉訪司事。王遂男孫五。汝玉。行臺監察御史。汝立。汝礪。餘未名。女孫五。有從者三。吉州校官許崇慶。戍守眞揚。萬戶劉遂壽。武庫使劉復。餘幼。男曾孫五。女曾孫一。皆幼。銘曰。

定公策仕。于顧成世。弱齡卑官。潔慎已至。世祖淵龍。謂治須賢。蒐以自毗。如渴繙泉。公焉其時。先後胥附。及踐天位。大正百度。以公爲郎。左右中書。凡我庶政。丞相共圖。日月入告。天顏謐顧。不愜于威。不愉于豫。垂十五年。政治隆平。維帝之明。公猷是經。將一文軌。襄漢其始。出公軍諮。爲烈益偉。旣下江夏。人暴而仇。公則緩之。敷澤優優。粟飢藥疾。于賦于役。勝國厲民。靡不與黜。大盜劬勦。動萬爲曹。以言爲兵。訓栴其豪。民視曰公。子父予母。胡不像之事。以豆俎。聞遷省洪。出涕齋咨。洪聞其來。以抃以嬉。旣釋岸獄。載糗與粥。舟取溺逃。于彼登木。南安勦狂。不缺斧斯。僭僞都昌。生致用方。惠懷其仁。兩省千里。聞其告凶。號啼婦子。疇非位相。死而罵長。伊疇若公。沒世不忘。謚于太常。傳以太史。矧世其德。衆多令子。有恣歸山。螭石麤寫。

神保焉依期古與終。

資德大夫雲南行中書省右丞贈秉忠執德威遠功臣開府儀同三司太師上柱國魏國公諡忠節
李公神道碑

皇上嗣歷之元年制特進中書平章政事教化開府儀同三司太子太保太尉平章軍國重事上柱國魏國公申勅有司夫旣子孫膺是顯庸共政中書疇咨寓內而所光昭世德上及其遠者舊章未脩非移孝以勸忠也其訂以上翰林奉常禮曹之臣請贈諡其曾祖考達爾沙貝結爲効忠翊運保德功臣開府儀同三司太師上柱國曰康懿祖色爾勒結爲推忠佐命宣力功臣開府儀同三司太師上柱國曰貞獻考資德大夫雲南行中書省右丞阿魯爲秉忠執德威遠功臣開府儀同三司太師上柱國曰忠節自曾而下三世皆同封魏國公會祖妣梁祖妣田妣王皆從封魏國夫人制曰可教化以爲四世死生胙以大國爵之上公人臣寵光至是焉極雖百其身報塞未能啓求儲皇匪刻金石將無以侈今而垂後敢以是請乃爲下令太子賓客姚燧太子諭德蕭顥太子太保潘陽王王璋其爲撰書篆額燧據翰林學士程鉅夫事狀與其家乘次曰康懿之先七世相夏同其王李姓以小大稱及貞獻生配姓與官名以色爾勒結太祖戡定天下夏氏旣臣會其西征復武帝聞旋師入討勢如頽山之壓卵貞獻總兵游徹遇之遂來歸俾同呼圖克特穆爾招沙州州將僞出牛酒犒師發伏以襲首帥馬蹟以己所乘易使先奔自乘所蹟爲殿逆擊敗之他日帝問卿臨死地易馬與人果何爲心對曰臣新至者陣死奚恤不可失帝器使宿將由是

忠之遣兵圍肅州。守者其伯氏鈴部。謀以城下。不克。害及其家。帝憤。拔城。皆殲之。不遺鬻稚。惟聽求其親族。臧獲。就所得爲百戶有六。又詔自今親族臧獲未盡收完。及田業爲諸人有者。亦悉歸之。其永爲制。歲乙未。太宗詔定宗。憲宗兩諸侯王。與蘇布特征西域。明年。帥師戒塗。貢獻在行中。又明年。至袞騰吉斯海。尋與諸侯王巴圖。征俄羅斯。至葉爾羌城。從憲宗先期至。搏戰七日。拔之。歲己亥。冬十一月。至阿蘇穆爾。齊蘇城。憑堅攻。不卽下。明年春正月。凡三閱月。貢獻從死士十人。踰梯登陴。生拉十一人。大呼曰。城破矣。衆蟻附而上。遂拔。賜西馬西錦爲匹。皆九名。以巴圖表其戰烈。又明年。詔班師。是役也。六年而歸。功長千夫。禮秩與國人爲千戶侯者等。加宴服。四序異宜。凡若干襲。與大會者皆同其色。又俾同伊瑪齊爲斷事官。爭朝。歲丙午。定宗卽位。曰。是大名。昔朕分封卿往爲監。至燕。則同斷事官哈達署行臺。後憲宗以布扎爾來。洩行臺錄其舊勞。又俾同署。別錫虎符。以監大名。至歲己未。凡爲監十四年。當繼饋世祖南伐。未踰淮。輿疾歸。薨其家。七月二十有八日。年六十九。傳護輶車返葬肅州。祔其先塋。別封虛墓大名。求便歲祠中。統建元。天下庶務悉歸中書。故忠節公襲虎符。惟監大名。至元五年。詔諸侯王和克齊開國雲南。俾將衛士以從。至則責治軍旅。金齒弗率。纔將射士五百人。殄其衆數千。獲馴象七。致貢京師。勅用以駕輿。自是蒐田征伐。無不乘之。實前古未有者。始帝加兵雲南。取道吐蕃。甚回以曲。十四年。思播旣降。改由蜀入。命公開二塗。陸山鳥蠻。水由馬湖。鳥蠻合都掌圈。豕鵝夷諸種。拒而不受。累戰始服。自時水陸郵傳。皆達敘州。又俾除左右兩江道。達邕管平溪洞夷獠五十餘州。十七年。詔將雲南萬衆。合湖廣四川兵。討羅氏。

鬼國之叛十九年再征獲其酋送京師竄有北死二十有三年詔征緬緬瀕南溟大國戰始克之不及郡縣而還獲大象二十有七送達尙乘明年詔鎮南王再征交趾命將萬衆會之平三十八柵前大軍一月至王宮王及世子興道皆船舶逃南溟禽一他王以歸明年師還衛鎮南至左右江界辭還歲戊子夏六月十有八日冒瘴癘道薨軍中年六十三最其履歷始爲金齒等國安撫使入覲改善闡安撫使陞雲南等處宣慰都元帥虎符拜雲南行省參知政事再遷左丞未拜資德大夫右丞加宴服四賜尙方鞍勒弓矢介冑實使相西南二十有一年地周萬里小大之戰無慮百數軍士有勞其出而家大而櫪馬細如囊衣金銀幣具不吝畀予故能得其死力每捷無舛荷旂夷蠻響其威名已臣之國撫而綏之爲定金賦以戶高下爲衰迨其薨年籍是一省輸金之家近二百萬計聞帝悼之給五十乘傳還其柩葬大名贈銀青榮祿大夫平章政事諡毅敏公後三十有一年加今封諡燧嘗合是三世以觀貞獻忠節父子逮事二祖三宗六十年間宣力樹勳西夏雲南勤亦至矣受是褒誅固其宜然而康懿則相夏氏實勝國臣由于孫貴亦與立榮足昭皇元淵乎忠厚恢乎其仁盛德之至也聞又求國魏所由貞獻卒監大名公嗣爲之去之雲南公弟又爲死而公冢嗣軍國與其姪鄂諾皆爲虎符今其爲者則公季子呼圖克皆爾若小大宗父子祖孫兄弟六人迭出爲者其與世侯奚以異諸亦今代臣鄰之鮮儷者公三子二不再見中子則今江西行省平章三女長適同知台州路事巴約特次適浙東右丞宣慰都元帥阿爾丹幼姆男孫六人庶長監中慶略餘未仕女孫二人銘曰

卽戎有勳官及而世不絕其傳列聖之制由子旣貴推恩其先前聖斯之一二有焉於皇今聖德參載巖立愛自親教民以孝致位光顯必崇其親赤烏執珪立廟昇陳昔李七世下及康懿左右夏王貞獻則異聖武是忠八殿出鋒後服加殲必全乃宗常顧成廟詔從西代城凡悖頑賈勇以拔其干天誅曾莫稽逋六稔言還功長千夫定宗御極曰茲魏土分封在子而往其撫忠節世之九年于茲從諸侯王南詔往釐跳梁小夷尺箠以笞大如緬交南溟極浦悉將致討而竟死鼓自其去魏其來其誰則季父姪冢季子爲職民世侯前聖已廢獨于之家疑若猶在皆今國魏四世靡他其與虛邑不地如何有繩維孫有煜其祖匪師伊公一是開府死者已矣生則立朝爲民具瞻席絕百僚維明天子啓宇于此咨爾後人思服其始

侍衛親軍都指揮使李公神道碑

開府儀同三司平章軍國重事、中書右丞相、贈太尉、諡忠武、史公中子。今中書左丞、闕闔江陵、行荆湖北道宣慰使、扛視今江陵總管李珪則故夫人之季也。以其季今東昌總管杞兩嘗塔我先世父中書左丞、贈少師、文獻公與李氏皆太尉姻。又珪友燧而齊年來言曰先太尉所由以致是勳名者先外舅氏指揮實始終左右之而珪亦曰先公出處使和旣狀願銘之碑遂參伍故翰林學士李治敬齋之三韓李氏先德之碑而序曰系之遠者不究已考諱福力穡致饒而施讀書能通其槩親親長長下儕輩無忤仁蟲豸不踐性由天出匪學也生公諱伯祐隸太尉兄金紫光祿大夫河北西路都元帥麾下十年其倖武仙殺元帥一家百口據真定叛而事金完州中山皆應之先是元帥之考尙書嘗戒備仙元帥則曰大人奈何

教兒設嫌遇人尙書悲曰。若必死之人手。吾不忍二孫同禍。乃攜故真定總管楫。故江漢大都督權。如北京。時太尉在燕市入覲禮幣。公馳告。宜歸復讎。太尉從而南。潰軍已須滿城之徐河。公唱令集賢大學士王禹之考參謀某。今參知政事王好禮之老大使縉。推太尉嗣兄元帥。凡失地皆復之。仙走壁雙門。公北見太師國王。王馳使聞。詔太尉真嗣兄河北西路都元帥。虎符公爲都提控。仙復夜襲真定。取之。太尉惟從公遵城走東北。公告太尉。吾先自投汝。隨而下。幸我藉汝。使汝不傷。吾死無害也。已果兩全。涉塹。公又爲前水及其頸。太尉惟及胸。泥奪韉襪。旣岸。跳走藁。藁帥故中書左丞。贈平章政事。忠獻公董文炳之考某。已艤舟渚沱。卽馬入藁收兵。諸將有異謀者。公手斬之。再復真定。仙走壁抱犢。旋走遼河。轉鎮撫軍民都彈壓。豪戢弱立。從太尉破衛新諸州。又從圍汴。金主自將逾河。破之黃龍岡。走歸德。濁河爲池。主帥薩奇蘇巴哈。薄北門而陳。左右皆水。公以爲絕地。兵家所忌。宜退保寬閒。不從。會中書左丞相。贈開府儀同三司。太保。謚封并國武宣公阿珠之祖蘇卜特。召太尉人汴計事。公與之偕。旣走軍大殲。藁帥董公完帥鄭公。韓公。十千戶皆在死列。金亡。移兵伐宋。下徐州。與其縣豐沛功。授金符。攝本路兵馬都總管。從征襄陽。敵柵峭灘石。舟師衛之。帥下教太尉。其必拔而歸。乃將公等死士二十人。公曰。可計致之。出十艘爲挑。鼓旂而前。俟敵逆戰。輒退止。已復鼓前。敵拒。又退止。三鼓。敵以爲怯而懈也。不拒。遂疾趨敵舟。太尉先登。公繼之。覆舟師。平其柵。從戍鄆陵。又從拔壽春功。拜千夫長。後太尉使經略于汴。屯田河南。立平宋基。以公年先一紀。無從留後真定。攝萬戶府。給軍之須。約相婚姻。憲宗自將征蜀。太尉旣從。世祖以太弟之重。

分趨荆湖。復召公從。濟江徇地。多資其畫。中統建元之明年。太尉當國。多勞公于上。上亦念從濟江。以爲侍衛親軍。都指揮使虎符。又明年李璿反。盜據濟南。徵兵諸道誅之。衛士亦在遣中。大軍舣老鵠口。公與董忠獻公合請。太尉洩軍報。可。太尉至。築夾寨遏奔突。以待三月。璿窮而縛。梟磔以徇。公旣訖賞。遂致事。陳蒲槩一堂。教童妾爲歌舞。行觴娛留親賓。而不自飲。囂囂恐不足日爲事。以至元某年月卒。年八十三。葬某地。爲人諒直而不剛。愛爲言。太尉家事亦斥不避。在軍不乘喜怒殺人。不事老佛。再復眞定。屋之列肆者半城闔。有以無居室來丐者。人賊一間。數年而盡。惟其弟存奴婢三千人。歲晚皆民之。平金殘宋。爲元顯侯。卒日貧不能葬。三夫人赫氏游氏趙氏男十五人。珣瑜珍琮瑄瑾公懋珏璇瑜璫珪琳瑀琦。其官者珣眞定等路管軍千戶總管。則寶慶路琦與珏也。公懋沐陽令。琳提舉越州人匠。女十二人皆適名族。官者則今參政好禮。與今使相故祕書郎張行儉。男孫四十一人。未名。女孫二十四人。歸史氏者六人。一使相中子。官者眞定路總管王某。濟寧鉅野尉哈斯託里。男曾孫十七人。女曾孫十三人。公旣致事。時禁網猶闊。諸將多以僮奴代兵。而歲取富人更直多者十人。少亦四三。會用兵襄陽。覆實軍籍。有此者罪死。珣長千夫。爲其下。訐曰。指揮所亦庇三人。珣引罪不力。事將及公。珏時爲質。代曰。吾以吾爲質不足資用。爲之。吾父未之知。下吏重錮。御史交讞。終不易辭。柄臣三人奏置于理。三畫可矣。而柄臣三人亦終哀其志。爲親臨刑。不悔。三奏前赦旣原。不可者三。行省臣奏軍官未受俸。前罪宜無誅。可之。珏宜出矣。省院臣終以事宜特聞。合而請之。始可比出。凡幽四年。從大軍南征。功宜別長萬夫。聞兄珣卒。子幼。不可世。恐人

奪有之。乃棄己功。求代兄子將。曰。長千夫。吾父兄世官也。吾宜世兄。須其子壯而授之。戰鄱陽。湖真定。灣頭堡。焦山。皆捷。攻常州。先登。拔其屬縣。宜興。從殄宋益。衛兩王海中。功授吉州總管。滿換湖州。而江陵。斯其爲子弟臣槩之大者。故表之。公碑之末。銘曰。

古觀遠臣。以其所主。賓于而家。暫至與去。以友賢者。猶取盛譽。烈烈忠武。爲元元功。求今將相。人莫等崇。公也。主之。同其始終。其始則自。推繼兄帥。圖不反兵。逐仇再躡。戰野無前。登陴奮先。滅金于殘。戡宋于完。于河之干。于淮于漢。靡往不皆。鄰死奚算。忠武報之。爲好其家。相世婚媾。井里旣華。終以從蹕。未襍之國。逮其丞相。進置帝側。疆場之臣。禁旅是帥。宿入衛出。肅而祁祁。人之策之。曰久其據。而公翩如。委視投羽。其施不斂。不溢其持。豈固嗇之。多後裕垂。茫昧其來。匪言而告。有碑載銘。左是神道。

牧庵集卷二十

神道碑

資善大夫同知行宣政院事張公神道碑

維張氏汴之浚儀鉅姓。金由歲甲戌。宣宗播汴。河朔逃兵之民。皆扶攜婦子。從之而南。蕞爾之土。其出惟是一夫之耕。不足以食百人。有司又括粟餉軍。以就盡之運。抗方興之師。徭賦百至。猶不能支。故人心日離。望望焉而思大兵之至。以紓其急。歲壬辰。睿宗大殂。其軍鈞之三峯山。義宗播歸德。大河失守。故其祖得棄鄉北渡。樂而家燕。會燕薦饑。嘗散居積以振之。祖考之諱皆逸。惟知其考字善甫。三妣戴李南。李實生公。諱天祐。字吉甫。就傳讀書。聰穎絕羣兒。簪仕。經歷工匠總管府。以儒術飾吏事。至元十有四年。轉尹歷城。未赴。改同知棣州。十八年。詔發濟南傍近十路民五萬人。濬交河以通海漕。責公董役。丞相噶巴齊臨治其上。自春徂冬。方十一月。天寒水冰。數言宜休役。待春徵集。不爲臨治所可。及行堤。見僵死暴棄。則盡傷曰。吾曹媚上急功。使民凍夭如是。悉縱遣之。民歡躍歸。因彭言曰。脫上見尤。吾請身坐。不以相及事聞。帝大嘉異。裕宗時爲儲皇。下令升經歷功德使司。尋改總判院官。奉訓仍經歷。二十三年。官太中。太原路總管。爲纔一年。有德邦民刻石頌之。明年。官中議。參議尙書省。參議要官。非其才可以彌綸宰相。圖回天下者。不足舉其職。又二年。官中奉。拜中書參知政事。大德四年。食宣政院。七年。官資善。同知江南。行宣

政院以三官釋門。故于佛氏爲教。信奉而篤守之。慈祥惠愛。多所及物。有司政或病民。如徙江浙巧工入將作。爲之授方。使吏不得爲姦利。居刺樂業而行輕。去其鄉不怨焉。宣政五年。祝髮之徒安之。以爲不繁。出令以重斂諸山者。惟公一耳。拜疏于朝。請留者數十上。至大己酉卒。年六十三。越十七日。從葬西山。其祖始卜之宅。嘗稽後世官制。貴賤與古反。易古自一命至九命。上公而極。今則九品而進乎一公。起布衣。積官報政。與知院致位二品。實古八命侯國之君。非獨歲時有以加數。備儀奉嘗其先。爲子孫者。亦得衣被休光。以紆朱紫。眞善大其門者。一女弟同李出。適士族。夫人耶律氏。次王氏。劉氏。范氏。索氏。七男。志惠忠。懋。慧。恕。億。五出夫人。惟恕王出。億。劉出。六女。四出夫人。長適寶喇巴哈三。爲監州。一王出。一范出。王劉范索卒皆前公夫人子。其男女恩過所生。至大庚戌。翰林學士承旨耶律希亮曰。夫人吾從祖妹也。持其從祖兄戡鄂特之狀。求銘公碑。其辭曰。

因陵其高。力半功倍。孰與平地。進覆一簣。緊張之先。發我庾餘。則報于天。如持左符。實生令公。始學自力。迨其簞仕。共工是歷。後銓尹縣。薄而不爲。改倅棣州。州用事治。浚交漕海。五十萬指。自春徂冬。急役未弛。公憫凍殤。丞相不謀。下令縱之。擅吾受尤。事畫上聞。帝嘉曰。果遷牧于并。頌石璨瑳。尙書中書。機務兩參。事輒背馳。資言指南。出知宣政。實司祝髮。故于釋典。得其津筏。昔人之爲。箕斂諸山。今公之來。退食閉關。僧徒安之。聞欲滿秩。留者抗章。上凡數十。可因灼見。舉職之能。鼎鼎宜其名。舉位升卒。從其先。西山之兆。勒銘隧首。千祀有耀。

少中大夫敘州等處諸部蠻夷宣撫使張公神道碑

公諱庭瑞。字天表。姓張氏。其先臨橫全州人。曾祖淵。祖士明。以有功金初。再世千夫長。考楫皇。北京都轉運使。徙家白霄。三子。公其季也。幼志不凡。己以功名自許。讀書力學。經史之餘。兵法地志。風星卜筮。靡所不闕。既冠。宿衛憲宗。俾從征蜀。佐軍前鋒。帥如所策。戰皆捷。會其陟方帥。待兩端。世祖斬之軍中。獨忠謹公。仍佐前鋒軍。中統始元之明年。詔元帥府全師戍清居。賜金符。俾參其府幕議。合時未下。直清居南百餘里。虛實動靜。皆可相聞。日夜戒備。徧漏塞罅。敵無得乘。加善綏懷。所獲調俘。不誅全之。小物利人。慮亦必及。中土艱蜀藥。其地饒橘。課軍士之休役者曰。袖手何爲。其人日入皮幾何升。皆庫貯之。莫曉爲何以也。視商旅有貧喪其資。滯不能東者。召以其所有畜來。無問幾何蹄畜。給一石。皆感泣歸。語父母妻子曰。三相救我。自爾相之名籍籍行路。用兵開達。以虎嘯山關渠江。可絕二州漕塗。詔公爲帥府先鋒。使將五千人城之。旬日而營壘儲待皆完。以充制使。夏貴集四川兵數萬圍之。諸將勉宜速戰。公曰。無庸。彼衆十我。往則殲矣。可遣閒取援帥府。須至爲圖。今惟有分地死守以老之。吾不爲主。而爲客耶。敵礮吾壁。當所皆穿。築柵捍之。柵連壤。乃離柵爲塔。虛本不築。裂牛馬革衣犬樹磨之。令可去來。礮至則偃。已乃復植。敵以城不可井。必資澗飲。泉出甚微。下薪土實之。公沸人畜洩溺釜中。入土以泄其臭。人日數合。吻皆創裂。終夜行壘。至于立寐。如是踰月。援至。不敢前。公下令曰。敵策吾怯不出。必嚴外而懈內。今與之角。可必逞志。分千五百人爲三。夜擣貴營。果大崩潰。禽斬都統繼俊。雍貴。胡世榮等五人。馘首千。遣委資械萬計。以

通公亦身負數創。功聞加賚之澤。舉軍覃焉。授奉議大夫。守高唐州。濟師襄陽。始抽中民之家爲兵。賦州若千百人。恐吏出入爲市。身按籍取其壯者。與借衣仗尉兵。權宜畀之。編諸行伍。教以進退。不相干越。或曰。足是抽數州責止矣。教之何爲。公曰。吾所抽兵。比其啓行。縣官或遣使。或覆閱。未耜之衣。不掩肘。旣雖材責育。誰則信之。其時留甲退乙。更逐紛紛。徒自後期。衣之兵衣。韃弓手戟。自足觀矣。閱使至。果惟曰。高唐之兵精良。教民力穡。野無萊田。暇則使脩孝悌于鄉校。豪梗戢縮。盜去其無。鄰獄疑留。率咨平直。大司農考績。以治最聞。遷朝列大夫。濮州尹。詔布多方。仍黜其殿者一人。爲長吏勸。辭之。省曰。如司農言。正守職也。豈敢爲勞。且州非守獨爲。上監下貳。功則均。獨旌何爲。不敢奉詔。省奏併陞監貳。迺尹濮。御史臺賢之。奏遷中順大夫。陝西四川道提刑按察副使。風紀峻肅。吏重足立。爲京兆者弗便也。中之秦藩。都漕公及夫人皆不恚。入謝奉教不謹。都漕曰。吾嘗憂汝昆弟。洎官庸懦。不足受任。今居騰鷗。以擊搏見傷。誠克舉之。良子酌酒壽之。庭臣聞其誣也。爲避之。奏徙四川屯田經略副使。踰年。以東西兩川各開樞府。大徵兵圍重慶。其舟楫兵仗糧儲。資取成都者十八。換成都路總管。而四川中書左丞李忠宣公德輝。以王相理賦四川。凡屯田征商。與鹽茗木竹山澤之產。民已輸而算未入官者。皆蒐剔之事。皆倚公以集。一歲而羨衍彌倍。以繼餽漕。自餘學校農桑。津梁陂渠。府寺館傳。先政廢弛者。莫不興張。蜀平。升少中大夫。諸蠻夷部宣慰使。雜獠犬牙綿絡。慮鼓思播。施甕之壤者五十餘種。椎結荷旂。將數千里。統御羈縻。析其州縣。繩削而礪門。羌有階。婦女老稚入市者。爭直殺人。爲宣慰礪門魚通司繫于理。其酋斷繩橋。止蜀商于

微謀大動兵入寇篡之其司馳告汪忠肅公惟正以中書左承行省成都問進討謀公曰羌俗悍獷喜馴怒逆其所性然由殺一人而遽待以門牆之寇小兵不能威大兵不煩興惟可遣使開諭彼雖凌信而昧理至撼以禍福亦豈有不回者耶忠肅曰無踰公者遂從數騎就塗前遣人曰吾至矣其相俟而界羌酋陳兵來公曰吾從數人而猜備如是何爲羌人舉天子民殺人償死一律治之今有司逮所偕來特使辭其見知情之所由爲援質耳非併盡誅之也而汝爲是跳梁行省如以狀聞萬一赫怒徵近郡加誅而汝確有遺類乎亦奚不辭之盡劉可鑒也何仍負叛名爲之續使壯士推首白刃妻奴人乎此宜慰魚通司礪門者宜言吾懼汝之妄舉而自尊也故越吾司而曉汝其酋率種屬羅拜曰吾昔者取羊生磔其脾卜之視肉理何食曰吉白馬將來可不煩兵公乘果白馬神語昭昭敢不惟命乃論殺羌賊而出所偕卽日復繩橋還蜀商通市遂與約自今市者如故事無入礪門惟集郊關日昃而歸其酋等曰亦惟命又以民歲摘茗官收糴之爲局自鬻公變其法聽民入券自與羌市令黎雅戍兵屯白廩罷泝楊山江漕穀以免嘉定舟民覆溺都掌蠻反詔公以行省兵誅之公請罪止首惡無及非辜可之其俗惟善挾槍擲人而以過額厚握松板爲盾自蔽已陳公馳馬射之矢出盾背半筈其種駭怛曰何物弓矢如是其力也遂捐兵屈服惟斬其酋達蘭雲輩十人再授敘州等處諸部變夷宣撫使後仍故官轉潭州總管浮舟山峽過南郡燧時貳荆憲相語曰吾聞是州戶滿百萬長星爲治而湖廣省臣方事廢剝禍賊變詐月異歲新吾不呵之祇益罪耳不能爲也遂去之秦其前植業在樊柱者上田五千畝渠義谷水灌之雜蒔桑果

可材之十萬根。奴婢千指。旣畀兩兄。田賦歲下。不及兄。糴谷入之。其自取者。惟城中一第。與西郊之園百畝耳。今歸。每不城居。徜徉輞川泉石間。南直聖燈巖爲堂。罟魚于淵。穿鹿于山。賓客過之。留飲彌日。頗知爲詩。嘯歌自娛。凡居三年。忽曰。吾樂吾成都竹溪。秦父老遮不能止。時已疾矣。後是二年。當至元二十七年四月十四日卒。夫人劉氏淑質懿行。公所敬友。及是偕其三子。巘岑岷扶。匱還葬安西之威寧少陵原。都漕公之闕。且爲書託山南江北道肅政暢師文。以今集賢盧摯誌銘。求銘墓碑。摯之言曰。公與仲氏俱名良。二千石爲時所器。期以公輔。年位未究者。豈以公年僅過其兄一年。止五十七耶。惜哉。公孝悌忠厚。深沈明炳。朋友孤嫠。有不能家。必周之。使可安以終身。有妾慧豔。若嬖之。或告與人語。屏所問之。則曰。吾父也。召諸逆旅。貌若甚肖。叩其離兵失家歲月。與曩聞同。隱悲且是。公曰。而民耶。人役也。父曰。民爾。曰。欲得之乎。對曰。鄙人之來。直以兒在公所。不訪而識之。非人父情。豈求俱歸。公曰。而女居吾家。終不能拔列羣婢。令夫人盡取其奩飾衣服。署良券。歸其父。曰。資是嫁之。父子泣曰。何以報公。惟有繪像事之。靳其壽考耳。吾友勸農使韓世英歎曰。以義斷愛。人所難能。其力于爲善。率此類。三子惟岑爲嫡。二女長適李鵬翼。次適某。銘曰。

維公自少。期我振耀。薄宦入臣。入衛憲廟。憲廟受臣。其審其難。一簡在心。誠推用殫。六飛之巡。前茅劍外。大旆攸經。有順無悖。方號賓天。遭顧世皇。佐戎清居。屢摧斧斯。虎嘯孤軍。保新立壁。飲血勸忠。一逐寇十。帝曰。歸哉。汝勞汝西。其守高唐。字我東黎。鼓鼙之臣。熟手威忍。或于元元。未善憂軫。考績多方。治獨最之。

誕誥尹渼，俾長吏師。俄貳秦憲，旋蜀經略。輟土矛弧，授以錢鎛。邊穀用豐，就牧成都。大兵圍渝，十萬仰餉。需急應繁，無少豫暇。朝聽之殷，恆獨繼夜。庸蜀平矣，帝曰：「夔夷厥俗，荷旃惟汝，使宜其慰其撫，節以華汝。」大狂兵之小頑，訓語始猶革面，久悛其心。陸馬水舟，相望獻琛。晚移長沙，羞姦竄輩，以完吾前。惟駕早稅，凡蜀齊秦，長民總戎三十維年。四稔居東，人遠遙之。在庭使籛，其收爲庸寧已。是茂我銘豐碑，匪伊桓楹。英風百世，凜凜猶生。

山南廉訪副使馮公神道碑

公以至元二十八年，年五十九，九月六日卒。官朝請大夫，山南江北道肅政廉訪副使，于襄陽燧遊吳會，還過行臺廣陵，得計于故御史中丞魏初所，遂出涕相弔。後三年，始拜其墓，指桓楹誓曰：「公平生交友，閒交惟我怡者，他日當銘是爲報。」子休復亦已敍所履歷見求，因記前卒六年，嘗敍馮氏三世遺文，有曰：「以中議年五十九卒，官同知山東西路轉運使，故中順方年六十，以同知臨海軍節度使致事。至通議亦以同知集慶軍節度使六十致事，三世皆止同知，亦理之不偶然。事之可異者，公抵掌曰：『若是同知不善吾家耶？』吾他日有避而不爲耳。今公之壽僅齊中議，校所卒官廉副班序，正與轉運節度同知者等六命。四世卒致皆不逾六十，嗚呼！造物之迹，人果可以意智闕耶？」中議中順通議爲高曾祖，諱仲尹子翼壁。考中書右部郎中諱渭，世稱馮孝子。公之先諱由通，議築松庵崧山，曰崧，後更帖字壽卿。童子聰警，于書博觀彊識，賞于中書忠肅公許，妻以季之子。闕幘由貧，試史征商，屹屹自飭，不盪華惰。中統建元時，年未壯，入

據中書職奏事。曹策識沈明得失先事。日從丞相造膝清光。右部爲郎。自丞相辨章而下。皆友誥之。父子並政。法制未苛。不嫌也。人榮耀焉。或纔禁中。省曹多徒。顯庸在列。庭如汰擢。公以風度修凝。數對有次留。後一故相長左右幕。喜氣排人。諸曹讐縮。公不下之。故事。諸曹出。皆總管判官。獨抑公。真定轉運經歷。換衛輝總管。經歷官承事郎。令真定之無極。事治考最。換令洛之曲周。狀其薄貪懦黜之。圍襄陽急。發民益兵河之北。公惟視丁地入中甲者。戶抽一人籍之。請託不行。苞苴不入。形勢富室。施計無所。凡竄名他役者皆出。僚吏無所姦利其閒。江南旣一。陞奉議大夫。僉山南湖北道提刑按察司事。換僉嶺北湖南道提刑按察司事。二境皆錯壤夷蠻。人所憚行。公冒阻凌敵。瘴鄉蠶俗。上下山谷。至不可馬。或輜以杖。始數千里。刺舉周治。簡削冗長。官吏數百。臺臣勞之。移近畿甸。換河北河南道提刑按察司僉事。官市民物。不輒與直。責悉還之。罪去官吏三百。籍沒賕賂。且三千定。霜摧電掣。蠹朽皆折。唐之監州。諱發其伏。逃訟于朝。顧列公實田湖陽三十頃。禁殺曰殺。紆塗乘傳。多燒驛薪。不法十餘事。詔御史問之。無絲髮得。抵其誣罪。陞朝請大夫。江西北道提刑按察副使。未代棄歸。尋仍前官。換山北遼西道提刑按察副使。以疾辭。行臺臣終曰。舉職風紀。求歸者其私。不可釋也。擇其去家近在十舍外者。以使之。再換山南江北道肅政廉訪副使。命下數日。卒。僑葬檀溪之東。策仕至是三十餘年。恬忽時榮。退易進難。數命皆家受之。臨繁處劇。暇豫而集。遭佳林泉。野服佩寶璐。鳴琴賦詩。忘反移口。觀所號雪崖。亦可得其嗜尚。已俸入。盡于給故家之孤嫠。與娛賓。購鼎彝書畫。故遺產不盈十金。所標褻其閭甚高。跬步恆以羞親爲心。迨氣息奄奄。猶大

書松菴墓。馮孝子墓。雪崖墓。賜休復曰。各伐石表之。阡亦自喜其善全歸也。遺文千篇。晚而筆力逾進。辭多雄剛。深古。卑于文者。不能句求。凡再配前夫人楊氏。卽忠肅公妻者。今夫人王氏。其母休復。與休復母之。兩致其道。不知者。不以爲前夫人之生。觀行有家爲德如何。女溫香幼。三男孫。鶴齡龜齡彪齡。二女孫。皆下殤。銘曰。

公生自孱。見靈奇也。葱衡鏘然。妙爲辭也。人一善偏。已兼之也。其蘊淵淵。介介持也。其履平平。循循施也。入司奏牋。出縣爲也。同不俗牽。異不離也。責言言宜。責事治也。憲府所躋。吏不欺也。風行嶺壩。江之湄也。幾耳順年。不云耆也。厚夜長眠。寤何時也。聞之幅隕。多舊悲也。曰良弓傳。子爲箕也。柔木不弦。世業卑也。獨公青氈。守不移也。世德陶甄。不外師也。子于父田。播其菑也。父材楠楹。子構基也。有華蟬嫣。冠雙綬也。與乃祖肩。官醜夷也。皆不持銓。衰職裨也。豈天爲懸。座右卮也。不盈其泉。斯不敬也。信彼微權。馮氏私也。滹沱之川。浩瀾瀾也。苗冑必賢。餘波滋也。毋折楚簞。以筴疑也。麗牲有穿。徵銘詩也。

中書右三部郎中馮公神道碑

中統之元。肇分天下爲十道。道置使以宣撫之。我先世父中書左丞公受任天平。僚列聽自辟傳。過真定。將以公偕懼。不能致。乃踵門自起之。曰。天平地方千里。戶版賦出。將半諸道。而寄治庸淺。非得清厚和慎。舊德雅望如先生者。孰與匡政令之不逮。而抑其過。先生負用世才。不及見之太平有兆之時。陰拱何施。敢再拜以參議相屈。公答拜曰。某學不切時。無有可資。吾相取者。然不敢虛盛招。遂就車行。參議無幾時。

中書省召入爲右三部郎中。我先世父以尊吾賢佐。吾誰賴以爲理。居無幾時。亦去。公在右部。故相贈太尉史忠武公。贈太傅文貞劉公。平章趙公。宋公。張公。我先世父及左丞張公。大參楊公。賈公。尙書劉公。稽古議制。動見咨諏。又其始至。密院未闢。憲臺未建。尙書未分。兵刑工三曹之事。叢闡繁會。決畫開裕。于刑尤慎恤。禁天下諸侯不得專殺罪人死者。奏可。乃論輯要令條付之法吏。俾有持循。獄成。不輒置辟。必疏其情。文疑闕。讞下有司。緩須臾無死。以冀萬分一朝或生之也。遇于倫敗常者。必峻治竟之。黜廢之。國臣或失對。都堂欲詰其謾。公言宜示有容。不可苛明。以怙嚮化。以故于今之治。文物燦然。非夫人與有佐理中元力耶。公諱渭。字清父。姓馮氏。其先居定之中山。嘗臣五代。晉由齊王虜于遼。從徙北京。家長興。遼滅來南。系緒則自公六世祖可譜。蓋昱生遵讓。再世不仕。讓生金承務郎居泗。承務生中議大夫同知山東西路轉運使事仲尹。中議生中順大夫同知臨海軍節度使事子翼。中順生通議大夫同知集慶軍節度使事璧公之考也。自中議而下三世比及進士第。獨公由任子仕。人疑其爲問。則曰延賞及世。自有虞已然。歷古不刊。如曰假以爲忠勞之勸。是後世誅迫以利之術。非聖人大公至正。遇下以誠。不忘先烈之義。故其子孫不敢以能自致富貴爲賢。而以獲繩祖父踵武爲光也。自後世科選之法興。風聲之相盪。波流之相軋。鼓舞奔走一世之人。使子孫恆有不藉基祖父。可得自我之心。甚失興孝天下之道。近世惟程夫子仕由先庇。我法行之。上有稽先王之經。下不絕先人之澤。初掾尙書刑曹。移掌機務。後掾尙書省。知選除。金已蹙國。一闕守者。無慮數人。懷告身。致曠數考。無所于任。吏是職者。人恆聚詬其短。有見讎讎者。公

勾駁精密。先後黜陞。動有比依。號爲允平。出佐靈壁帥府。李全聚兵楚州。觀望前卻。不一其操。于金子朱皆未有屬。帥遣公馳說之。欲屬而軍受命卽行。不爲吾身。叵測毛髮計。至則撼以大義。陳譬懇惓。其旨惟在不可遺棄故君一言。全未卽從。亦壯其能使。不侵辱。善還之。守均州。軍事判官。改南京右廂機察。初金還汴。通議將逾河追及行所在。失公妣夫人趙氏。博聞公竄避梗棘。茹苦徒行。勤以事存。哀以求亡。通議感其志。曰。禮父在爲母齊衰期。父必三年然後娶。達子之志也。曾參以孝已殺。伯奇放。皆自後妻爲。曾元不娶終身。吾年今五十。其達汝志。亦不娶終身。金亡。侍通議北渡河。崎嶇齊魯郊。以還真定。出則親僕御。入則操井臼。求釋孤臣仁國之戚。不失故家素宦之習。可旨甘其口體。而夷懌其心思者。皆劬躬爲之日。夕不去側。立而坐。休而出一命之須。略不自遂。積歲爲世。不異一日。戴白紛如。猶爲孺子時也。執喪奉祭。哀敬兩致。世多不字。惟曰馮孝子。化行閭門。夫人事之嚴師也。出與人交。賢貴愚賤。一接以敬。別置白黑胸中。故與學士魏玉峰。內翰元遣山。學士李欒城。故承旨王愼獨。今承旨王鹿菴。最相款習。讀書爲文。不廢風雨寒暑。節錄經史。細及箋訓。又蒐輯金代文章。凡積若干百卷。專經左氏春秋。爲右部。年七十曰。吾家由轉運卒官年五十九。故臨海集慶再世皆六十致仕。獨吾貪榮滿年格。歸若後矣。會子今朝列大夫。江西湖東道提刑按察副使。帖自省郎出令無極。曰。吾祖臨海爲是。吾獲從養于是。天之私我多也。平生曉行衛生法。年八十二。猶神形精彩動人。以至元庚午閏十一月十有九日。卒無極寓舍。還葬真定三橋里之南原。通議之兆。文有常山集行世。凡再娶。前夫人王。後夫人師。金尙書右丞安石其從祖父。帖母也。

孫休復男曾孫鶴齡龜齡二人方童女曾孫一人尙穉後葬之十九年當二十五年戊子帖以公未碑棄江西憲副舟達襄陽六月又蒙暑入鄧示燧所自爲理辭白以先人與而先公相好爲故人今繼室汝姚氏甥爲嫻銘先墓碑非子誰義爲蓋朝請先夫人楊今夫人王其父詳議諱德溶我姚氏所自出之離孫先世父昆弟叔視之夫人燧姑道也用是不辭銘曰

維斧鉞威君之所司奚取于臣人牧專持用誠允明猶屬僭弄矧肆師心刑典不奉中元乾綱旣收旣張有罪我在敢越奏常公時用獄上體帝德疑昭枉信情狀已褻宜刑于辟宜亟徐之恩澤涵柔或幸庶幾輕平匪寬猛匪深害今三十年作則攸賴古曰仁人利溥一言矧士弼教出治所原又曰仁人立本孝子反覆揆公終始良是公孝越俗格父之慈弊齒寧鰥矢不再妻曾元以還兼公而兩清風在碑無期將叩

牧庵集卷二十一

神道碑

懷遠大將軍招撫使王公神道碑

王彥弼方總管南康。過燧舟中曰。弼老矣。將委印歸。畢先人墓事。出故人監察御史商號所狀曰。他日必求徐大參琰。劉集賢因與燧三人。一人銘之足矣。劉集賢亦物故。徐大參遠莫相及。且弼嘗事汝先世父左揆公東平。故惟君焉請。又曰。自弼及與君友二十二年。別君者幾二十年。不于是焉卽求。以待他日具禮備數而走三千里之石城。恐弼暮塗。雖倒行無及也。燧曰。昔司馬遷述漢傳。皆蒐訪舊聞。與遺老之言爲之。蓋職史者宜然。非必其時功臣子孫一一求見而始援翰也。燧文劣下。固不敢自方先賢。而其職亦太史也。今而曰先左揆門者。其可讓爲。謹按王公諱興秀。祖忠信。考濟。皆農蠶之博野宋村。我太祖始加兵中原。圍燕不攻。而坑中山。蹂山東河北。諸名城皆碎。已策金不能國。可必滅也。自將征西。而留太師國王穆呼哩徇河北。未下城邑。其年衛王弒。宣宗立。南踰河。都大梁。兵興。民旣困徵求之繁。餽餽人畜。雜死道路。至不賴以生。有遲我元兵者。曰。敵勢甕來耶。亦有不白吾令。特誅其後服。望風畏之。不敢至者。公聞兵將至。曰。丈夫生三十年。而勞苦耒耜。屈壓極矣。今已委身餌敵。暴骨草野。且吾君已棄民。民尙誰死哉。吾有自圖富貴耳。乃以是撼三十餘村之民。汝幸從我。我能活汝。乃將壯士數百輩出蠡疆。迎兩大帥萬

戶劉伯林御史大夫蕭公降帥善其來與之幟曰張汝之鄉我兵自歛戢不汝侵也大兵及城城方力完守具礮死蕭大夫兩軍憤厲一鼓屠其城無噍類遺而三十村無毫毛傷者兵去而艱食民死相藉公舊富粟地藏盡發以廩餓人又假爲種責其力田作以繼餬口又築屋數十楹以居病俾醫養藥其閒時其衣食所活又甚多以從師王徇地大名東平益都功陞新軍千戶又陞萬戶從師王朝太祖京師漠北時恆山公武仙壁真定西山滄海公張福柵信安水中授懷遠大將軍招撫使賜金符令招之僅得兩公潰民令散居祁蠡深三州種紅花紫草以供尙方織局後由諸侯王及功臣家爭遣使十出括匠天下劉某以大丞相行尙書省于燕亦遣公括祁蠡深三州匠爲局使公監之先是常祝天曰吾遭此大兵未嘗妄殺人死者活之饑者食之藥其疾而賙其不至未嘗不力于善也而天報施我者使五十無子何獨戾耶明年彥弼生至是告老以彥弼襲職彥弼能譯言嘗屢使憲宗朝少尙氣任俠其友不幸得禍彥弼願搢七首仇人之胸幸白屠死不悔友止之中統建元我世父宣撫東平召至監米家倉變陳惡爲白米八萬石授提領東平路鐵冶右丞相薦之平章塔爾禪公後姦人多竊馬私互市朝廷議其禁始置潼關大洋孟津中灤三汶等所以及徐邳八提舉俾司糾之凡乘馬南者必視其傳平章首薦彥弼可任我左揆亦嘗曰吾知斯人有敗則咎余平章言是以奉直大夫提舉潼關十二年公亦從養關下以至元六年三月八日卒歸葬祖塋夫人張氏年七十三前公卒子男三人彥弼所至事治發姦人爲起三百餘闕下得省參費正寅連謀宋書論誅如法關南禁溝高有支渠久堙其源公割俸淪之至今蒙慨利者二十村再換

中順大夫、黃州路宣課都提舉、民不苛擾、而額亦溢、再授知安豐府、今以少中大夫、總管南康、治皆有迹、仲彥柔、季元柔、早卒、女一人、適李信、生子讓、與一女、二十而寡、誓不失身爲夫子羞、子今亦官于朝、事聞、廷臣節之、聚土旌里門矣、男孫三人、元德忠、顯校尉、金符、海道運糧千戶、元慶忠、顯校尉、安慶軍總把、幼元恭、女孫五人、長適榮祿大夫、平章政事史弼、次適江西同僉樞密院事陳柔、次適滁之六合令董仲、次適里人薛某、幼在室、男曾孫四人、二早世、二幼、女曾孫四人、亦幼、評者謂史行部與公皆以鄉民迎降太祖、史氏自太尉與諸子孫將相五人、而公之子猶調常銓總管下路、何其厚薄遼邈不相及、而兩女孫之夫、顧皆將相、將天移報公德他們也耶、誠然、亦理之未瑩者、遂取銘之、銘曰、

觀先漢臣、陳餘張耳、耳終事漢、餘中畔棄耳、有趙王、餘斬泚水、天方與漢、能與者昌、天與仇之、宜旋踵亡、效于計數、一軌千古、今蠡爲州、中城外鄉、城捍恃強、唯類悉戕、三十維鄉、公樹降幟、豈獨室家、雞狗完遂、人曰是謀、王公爲之、孰是吾鄉、司命寄茲、旣全而兵、又廩而餓、又勛而稼、假種纓播、有疾與貧、我屋其居、于父母邦、推愛何如、止官懷遠、惟富其壽、年幾九十一世誰又、而其再傳、而子而孫、金紫垂躬、常銓一門、兩女孫夫、顧皆將相、移報他門、非天莫諒、維天道遠、人迹難知、其張其門、或在異時、螭首之碑、有光前兆、琢銘昭昭、來世爲告、

鞏昌路同知總管府事李公神道碑

公諱節、字子忠、考諱松、金寧遠大將軍、輕身都尉、隴西郡開國伯、食邑七百戶、由鞏昌府僉事、遷其府判

官行元帥府經歷。妣夫人高氏。從封隴西郡君。祖珪。以開國貴。贈隴西伯。妣夫人某氏太君。曾祖聚。氣服其鄉。鄉人曲直不愬。有司求聽其家。高祖澤而上。不可世也。其李姓隴西人者。或曰。猶漢將廣之苗胄。公生而剛明。其尙氣俠。得賦自家。長知讀書。曉習法律。遭時艱棘。以戰勞。自敦武歷忠勇。忠顯三校尉。旣官矣。復慨然曰。吾自求樹立。如人曰。吾薄門功。何始卽吏部取廕。試律射皆入等。出身奉班祇候。監華之渭南稅。未上行省。開闢平涼。開國爲奏差經歷。鞏帥田瑞欲異圖。乃閉壁錮人出入。是日公乘夜縋出。走平涼上變。及官軍至。故使宜都總帥隴西義武公汪世顯。時爲門將。開壁納之。縛瑞置法。公以先事發膚功。轉會州軍事判官。超鞏昌元帥。鎮撫都彈壓。兼照磨。加忠武校尉。便宜都總帥。府鎮撫軍民都彈壓。天兵已殘陝西。完顏仲德行省于鞏。招集熙河慶陽二十四城散亡將卒數萬。移鞏治。依險壁石門山。知麾下元帥義武忠壯可倚。時節至其家。拜事其母。無異生己。金社將墜。假義武以便宜。都總帥身將三千人東援。道敗之餘。纔三百人。達汴。金主已播。不至家。追及于行。說令西駐石門。因秦勁兵以圖巴蜀。不聽。走歸德。走蔡。自經死。仲德赴汝水。三百人皆從死。惟十二人爲謀。勢今業然。石門日夜望吾東音。計今日卽徒死。無益。必歸爲報。十至秦州。爲秦所止。二人越去語鞏。時秦帥鈕祜祿已不受鞏命。自爲行省。顧檄義武來計事。開國謂義武無行。請身往。嘗從公。旣至彼。以失乏軍興錮之。已誅數人。開國度不可得脫死。呼公前曰。吾書爲賊誤。語置枕下。卽自經。其帥欲併除公。賴賂珠其妻免。始從喪歸葬之郡東原。末卒。窆聞敵且至。衆悉散去。公曰。吾寧蹈死白刃。不忍敵坎不掩暴吾先也。竟卒窆去。敵旁午馳。終不至塋。義武孝之。

俾襲開國帥府經歷。蓋甲午正月金亡。明年十月其府猶稱天興。義武集將佐曰。主今亡矣。誰與爲忠。人以羣盜遇余。率軍民萬家爲口十萬來降。皇子奎騰義其後服曰。爲臣能然。何忍罪戮。仍官以便宜都總帥。凡其前所節度二十四城。還受節度。公亦仍便宜都總帥府經歷。始去險就夷。還各城居官舍民廬。皆剪荆棘。斬蓬茅爲之。使人父子兄弟得以休養生息。至今西土種族殷繁。誰之力耶。尋升鞏昌府推官。訟清賦平。再遷其府判官。帥從大軍歲入伐蜀。責使繼餽。雖千里數石不能致一之地。不匱功。超僉兵馬都總管府事。俄權同知。兼便宜府經歷。方年六十。忽不仕。而樂礫石山水。爲墅其間。號蟄窟。老人不踐城府。絕口官事。樹桑及他可材之木。若干千章。奇花珍果。埒是。惟樹松二十四。不多益也。疏泉列石。幽蹊危榭。人之至者。瞻眺忘歸。如在物表。時與老佛之徒。研思丹方。奧典如不足日。故舊或過。必烹羊擊豕。劇談縱飲。厭醉而罷。來者共席。不賤耕樵。年八十三。聰明輕矯。不衰壯時。登樓上馬。不藉扶掖。几杖非不御。不設也。一日疾。子孫問焉。顧庭筇等言。汝兄以喪來。其以爲言。奴婢數十家。吾食其力久。其民之。以至元甲戌冬十二月三日。爲詩而卒。計始爲墅。實二十四年。或曰。二十四松。蓋前計所止年也。明年三月甲申。附之襄武郡東原先塋。二夫人。陳夫人前卒二十年。繼夫人王。前卒三年。三子。庭玉。今資善大夫。陝西等處行中書省左丞。庭筇。鞏昌路兵馬副都總管。僉鞏昌府事。兼便宜都總帥府經歷。庭堅。便宜都總帥府鞏昌路都總領。二女。一適鞏昌路都元帥。兼權便宜總帥汪翰臣。一適魚溫。內外孫男女合八十九人。曾孫男女四十六人。平生篤于人倫。妣夫人高卒。事繼妣楊夫人。不知爲非其出。及卒。遺二女。俾陳夫人子之。筭。

未歸者。厚其資賄。嫁成州武亨。在抱者。撫至成長。嫁帥掾南汝德。又嫁弟忠孤女。鞏昌元帥府參議都總領嚴孝忠弟賢。府判卒。官其子至鞏昌都總領庭某。壻劉氏。夫婦皆卒。又撫其孤女。嫁師掾張珪。後庭玉自蜀軍中歲一再或一來。覲公不善。曰。古人以戰陳無勇爲非孝。豈可以我故輕去而軍。且吾所以甘伏田畝。樂之終身而不悔者。以汝及功名之會。有擧取之才。必張吾門于他日。孝孰大是。若晨夕侍傍。不致養。則汝弟責。勉思吾言。無以匹夫親親爲心。故庭玉一力邊陲。最自質子。至將相。凡六十年。崎嶇巴蜀。甘涼之郊。隳名城。摧堅陣。徠僞臣。禽逆王。與斬叛將。小大之戰四十。爲時勞臣。又善謀畫。以世祖之聖。能受盡言而不罪人。至人告大計。諸侯王猶苦于扞格。自餘老成顧問之臣。日月至前。如承旨王公。一拂其聽。雷霆之威。幾不可霽。而鼓鞞之帥。遠闕廷數千里。數歲不一至焉。從容片語。回軫聖慮。于十年之後。而得開可由何道哉。豈言適其時。不泛不迂。而切事情然耶。亦素諒其忠也。書之言曰。啓乃心沃朕心。尙其似之。此二官之篤其眷者。嗚呼。有子哉。銘曰。

善爲塗行。日昃而息。所以再秬。不窮其力。卽小而喻。公焉似之。謝仕未衰。豈年是期。無稱平生。日託巖穴。徒與草木腐泯爲匹。思公荷戈。逐逐羣雄。四顧長嘯。橫厲雲風。事揆義爲。不罪于教。語臣而忠。子職已孝。人紀立矣。爲榮斯多。人爵崇庠。我謂斯何。爰樹礪山。膏蔚阡陌。匪利斧材。惟以種德。責報其子。捷于鼓枹。曾未卅年。將相身都。有不話言。言而旣績。惟不授事。授靡不力。嗟今之人。或難其全。不難令終。而難令傳。公兩令之。桓銘斯琢。于礪之山。式配吳岳。

少中大夫靜江路總管王公神道碑

敦武校尉、衡之鄴縣尹天錫手事狀拜而言曰：先人少中大夫、靜江路總管，始從事故宣撫張子良公于歸德。實先生族姑之夫，後以掾事先少師公于汴，則天錫今請匪直以先生銘賢公卿之墓之多而來，以先人兩公故吏有好故也。則昭誅墳道者，捨先生奚託？先生亦奚其辭？燧諾之曰：子言良是，而先公及識之爲序之曰：維王之先天平人，曾祖而上，逸其諱。祖鎬，金泗之虹縣丞。考瑀，皇大將察韓署爲睢州軍民長官。初，大將嘗徙淮南某州降民于睢，以其家涼，再西徙于涼而奴之，爲其總管李侯訟之大帝，潛藩爲下教正之，還民諸睢。長官所領實是民也。公諱均，字閏夫，幼而惟儒之師，長學吏事，流輩以爲能。性倜儻，自許不凡，每恨枳棘非鳳鳥所巢，知者奇之，惑者笑以爲夸也。歸德鄰睢，金季宣撫公自范陽將其部曲奔泗州，將楚姓者，憚其驍傑，與一軍多冒法難馭，謀殲之，宣撫覺，一旦大閱戰士，率其徒十三人突入斬楚，併其軍，徙泗民四萬歸德。中統之元，公始從事是府，至元五年，故左揆劉武敏公開用兵端于襄陽，詔集天下兵臨之，制寵武敏，漢軍都元帥專將其軍，其年又詔先少師開省于汴，足其餽繼。明年，擢公掾省，九年，公策撼武敏，中合機意，爲奏官以從仕郎其帥府經歷金符，故丞相史忠武來莅師，明年，襄陽下，奏官以襄陽總管府判官。十三年，詔以湖南戍軍多疾，恐坐不習食稻，俾公舟粟若千萬斛，如湖南，故丞相阿爾哈雅所。明年，丞相奏官以奉議大夫、行省左右司員外郎遙知慶遠府。又明年，升朝列大夫、左右司郎中，皆仍帥府金符。十年，升中議大夫、永州路總管，二十有四年，升少中大夫、靜江路總管，二十有七年。

龍集庚寅夏五月二十有一日卒雷州官舍年六十四子天錫迎柩歸葬襄陽漢北古城後十一年始具碑墳道嗚呼概公平生遷七官未嘗一遭暇豫掾省則當徙河南汴梁之民屯田唐鄧申裕嵩汝六州之郊經歷則晝夜介冑虞敵行墨判官當詔故太傅巴延公將數十萬衆南伐大集啓行襄陽公位府末屬軍旅百需朝出而夕責成其躬徵呼之煩有窮日不遑食者當西南五十餘州新下而宋餘孽兩王僭號海中遠則廣之東西瀕海諸州近而衡永全潭之屬縣江北黃信陽皆袒臂和應覬受僞命以自爲名賊殺長吏平民據州縣壁山柵水負峻騷亂者在所千萬爲羣鉏鋤底平公爲員外置同正其安集之方諭信之言撫綏之使旁午于塗幕晝居夥功升左右司郎中之明年兩王死丞相加兵瓊崖儋萬海外四州留後造舟鍛刃饋糧一切供億靡不皆集爲永則前政當周龍張虎剽殺之餘長吏利之根株深治以取賊售公繩興事者以法寧謐而休息之州民與儒爭蒙其德狀其治于省數百輩隨有日本之師賦造海艦皆取材于民而促其期艦發矣犯法臣平章省復覈有司侵牟爲計局責償之徵斂戶及爲靜江始是郡由抗王師拔而坑之官寺民廬一炬盡燬惟婁鈴轄將所部二百五十人壁月城丞相小之而多其忠曰是何必加攻抽兵衛之視其終何爲也逾旬婁奮身前行曰吾欲降如苦飢何苟惠賜之食惟命乃遺牛數頭米數斛壁下一部將開門取歸復闔吾兵自上瞰之其曹方米炊不待熟牛繼牛噉之立盡飭其曹人擁一火礮坐然之聲發如合數百疾雷爲一城土震落烟燄蔽空吾兵有驚死者火滅骨盡無圭撮遺亦死事之奇哉迹是可灼其爲新造之邦之民也又會再詔皇子鎮南王再征交趾民懲前困皆捨

業而逃。十室空半。省檄公身至海北十九州。督餽。擔負遠向者。無慮千萬夫。軍不匱儲。又持詔料民海外。凡四涉鯨波。得戶增多。其舊十有六萬。省又爲計局。責償料民侵牟。而徵斂滋酷。凡是數者。皆取民怨仇。人循牆而走者。及公爲之。不驚其威。而事功立。馴。難事之臣。而使辱不迫已。其才長治劇。將順何如也。舒嚕氏遼之貴族。世連姻帝室。由金譌爲舒穆嚕夫人。舒穆嚕江漢萬戶老格之孫。瑋塔罕之女。萬戶圖嚕之姊也。婦王能顓家政。公卒而門戶益樹立。雖天錫一子。與婦孫宣慰女甚愛之者。嚴于教勗。不少借以顏色。俾以廕及。天錫尹鄆縣。亦确确其艱哉。內外姻戚皆服其寡而有操。公元配楊氏。續盧氏。卒葬盧兆。盧惟一女。與今三女。皆他夫人生。子如己生。一適某。餘幼。銘曰。

惟茲下民。陰隲者天。或闕而貧。或華以綿。世之信之。如寒與暑。其未逆知。不一方所。而獨于公。始終西南。由宋而汴。而襄而潭。而永而桂。極海之外。一遠而宦。一振以大。古九其命。今品反之。九命無從。九品則卑。公品登三。實古命七。州牧侯伯。其揆歸一。澤俾及子。吾元之仁。七品官之。鄆尹發身。何嫌于生。何憾于死。文以列功。碑漢之淡。

平涼府長官元帥兼征行元帥王公神道碑

王氏由宋敦武將軍。嘗令鳳翔之岐山。卒官。子孫遂家其縣之姜村。大父世昌。業金進士舉。父大用。以材武爲千夫長。生公而卒。公諱鈞。以幼名戚。七行。爲孤童子時。鞠于季父大有所。已。犖然有立志。長以俠聞。自令而下。一縣之豪。無不與之遊。甚爲季父所知。期以克大吾家。曾我元加兵關中。其視大城堅陣。不啻

驚風怒電之摧枯振落覆之如此其易也。幸大軍去而羣盜復起岐雍之郊百千爲曹以剽發財粟爲業。及旣殫亡無所得始掠人爲糧。于時行省開府長安累調軍誅之不能平。長安路絕而生齒益耗矣。公倡集鄉兵萬人自將壁拙山。後移壁三稜堡。偵得賊巢窟縱奇擊之禽張嵩北山。斬安和扶風。遣辯士說降梁七。弟乾州。梟楊政馬超山。磔線張汧陽。併將其衆上功幕府。遷都提控。再授鳳翔安撫使。行省棄關中而東。乃移所部與郿涇乾恆數州流民復鳳翔繕城郭闢田野爲戰畊具。劉咬章自敵來歸麾下多謀殺而取其財者。公壯其來發卒衛送入汴。由是汴郿方聞關中城邑猶有未盡沒敵者。遣問使懷食符卽拜鳳隴元帥。壬辰大蝗饑移民就食秦州。始與今左丞公之祖汪便宜義武公合力拒戰。甲午金亡。明年迺下我元。義其後服釋不罪也。俾將所部從伐蜀自効。其年鈔沔州拔大安軍。明年破成都入其郿。其年入覲以功賜金符。仍故官帥隴州。明年陷遂寧。明年襲萬州。戰皆捷。又明年由鳳隴元帥改平涼長官元帥兼征行。當弭兵之初平涼之民披林莽茨屋以居者無百室。食半蓬稗。故部曲聞徙鎮皆扶攜老幼以從。歲中得萬家。明年再從伐蜀再破成都虜其將以歸。先朝駐蹕六盤山平涼實近郡供億之須使者徵發旁午一日數輩皆取給其家。後賦入粟沔陽率十而致一。皆不忍征之民爲代輸三千石。故二年闔郡帖然。復亦由此故。比他諸侯家至今爲甚貧。凡在郡二十年請老于朝以子贊襲職。又八年當至元丁卯春二月五日卒。年若干。其年四月歸葬岐山之先塋數百里閒輜車所塗民哭之如失其親戚爲位以祭者萬數。問之則曰吾屬皆昔見活于公者也。夫人李氏同郡著姓前卒。子二人贊某官由知平涼府轉同

知安西路總管府事。方爲之資授室而卒。男孫二人未名。公以不及養先公。喪之終身。四十年不御肉。授官必推功二弟。初爲鳳翔安撫使。拔珪招討使。琳都總領。後爲平涼長官。元帥兼征行。又引珪代征行。琳爲副帥。陞鄜爲州。復以珪兼知州事。雅善岐山令進士劉繪。相失兵閒。及開帥闢。繪爲民洛西。宋自襄鄧並西山出兵爲劫。居者屢急。公爲具車馬。踰二千里迎盡室以來。敬事而歡奉之數年。後聞定乞去。固留不可。厚幣歸之。若是者皆牛資篤于倫理。不待學能者也。大本旣立。其他聞人父子兄弟廢于人。必捐金購之以全其天屬。得蜀士則延致幕下。俾有食以仁其妻孥。又其稚也。銘曰。遭時之艱。不武有力。可以服人。人則見役。大兵之餘。梟狼蝟生。膾脯視人。何忘不行。公憤以歎。高呼右祖。義而從者。旋踵盈萬。梁氏弟舅。嵩和政張。兇饕幾時。身膏斧斨。大慝旣殲。黨僞謀我。有以惠徠。用烏不可。汝饑然耶。我汝糗糧。寒切汝膚。我有衣裳。人人奮激。昔迷不又。恣公使之。公令敢後。滄海稽天。精衛所仇。誓銜木石。以絕橫流。金亡明年。猶用其正。元與一軌。來方請命。從征庸蜀。疾戰先登。奏功軒墀。稱之曰能。金節命書。擢長帥闢。萬室通都。棘茨起本。使不授館。至卽我廬。賦粟遠輸。我牛我車。種德在人。淪浹皮骨。年胡可長。名則不沒。矧子肯堂。有文而才。務昭乃先。未艾其來于岐之陽。于渭之浹。琢詩穹碑。終古之視。

